



# Kantri bai sot long mani

## Aja Potabe i raitim

OL manmeri i mas redi long hat taim PNG bai bungim klostu taim tasol bikos gavman i no gat inap mani long ranim gut kantri, Oposisen Lida Don Polye i tok.

Mista Polye i tok em i ples klia Waigani Pablik Akaun i sot long mani bikos gavman i hat long baim

K2.1 bilien bilong Nambawan Supa, ol skul i no kisim mani bilong fri edukesen o TFF, ol yunivesiti na kolis i daunim mak bilong kisim gavman skolasip, ol haus sik i wok long sasim manmeri, na gavman i wok long bekim K27 bilien dinau.

Mista Polye i tok dispela em ol sain soim olsem gavman i no gat inap mani long ranim kantri, na i

hat long kisim sampela moa dinau bikos mak bilong kisim dinau i abrusim 35 pesen Debt tu GDP resio na totol dinau i go antap long moa long K27 bilien.

Mista Polye i tok gavman bai no inap bihainim stret mani plen i stap long 2016 Nesenel Baset bikos K12 bilien bai sot.

Gavman i basetim K14.76 bilien long 2016 Nesenel Baset na dispela K12 bilien inap long kam long mani gavman i save kisim gol, kopa, oil na ges.

Tasol taim prais bilong ol dispela namba wan komoditi i pundaun long intenesenel maket, mak bilong mani gavman i save kisim long dispela ol komoditi i pundaun tu.

Taim ExxonMobil i salim pinis moa long 160 LNG kago i go aut long Esian maket, gavman i no kisim yet mani bilong dispela ges bikos dispela mani i wok long bekim K3 bilien dinau gavman i bin

kisim long UBS invesmen benk, Mista Polye i tok.

Sentral Benk i bin glasim olsem kantri i sot long mani na gavman bai hat long bihainim stret mani plen i stap long 2016 Nesenel Baset.

Las wik Gavana bilong Sentral Benk, Loi Bakani, i bin tok gavman bai nidim K12.7 bilien long balensim gut 2016 Nesenel Baset bikos prais bilong ol komoditi long maining na petroleum i pundaun long wol maket na dispela i lukim prais bilong gol, kopa, nikel, oil na ges i pundaun.

Tasol Tresera Patrick Pruaitch i tok strongpela disisen bilong gavman long yusim gut mani long ol nambawan eria i lukim gavman i stap gut long larim kantri i ran gut maski globol ikonomi i wok long bungim planti hevi.

"Mi no wanbel long toktok bilong Mista Bakani na arapela ol save manmeri bikos dispela toktok em i kamapim wanpela giaman piksa long paulim ol manmeri," Mista Pruaitch i tok.

Em i tok prais bilong gol na kopa i bin i go daun long 2012 yet na prais bilong oil i bin go daun long las yia.

"Gavman i bin glasim gut pundaun bilong dispela ol prais bilong gol, kopa na oil. Long 2016 baset, 50 pesen bilong K127.9 milien winmani i kam long mineral na petroleum sekta bai go long baset na narapela 50 pesen bai go stret

long Sovren Welt Fan," Mista Pruaitch i tok.

Tasol Mista Polye i salensim Praim Minista Peter O'Neill, Tresera Patrick Pruaitch na Fainens Minista James Marape long tokaut long pipel olsem gavman i sot long mani na kantri i stap long mak bilong bungim bikpela hevi bikos;

- Waigani Pablik Akaun i no gat moa mani;
  - Gavman bai nidim K12 bilien long bihainim stret 2016 Nesenel Baset;
  - Total dinau bilong gavman i go antap long moa long K27 bilien;
  - Gavman bai hat long kisim sampela moa dinau gen bikos Debt tu GDP resio i stap antap moa long 60 pesen mak;
  - Ol foren risev i wok long pundaun i go daun;
  - Ol kampani i kisim hat taim long mekim bisnis bikos PNG i no gat planti mani bilong ol narapela kantri; na
  - Inflesan bai go antap na dispela bai lukim prais bilong ol samting bai go antap;
- Mista Polye i tok ol manmeri i no ken westim mani nating long baim smok, buai, pilai pokis, na dring tasol ol i mas sevim mani na yusim gut mani long skul, haus sik na kaikai.

"Yumi i gat graun i stap. Manmeri i mas planim kaikai na redi long bungim hevi bikos kantri i no gat inap mani," Mista Polye i tok.



Sir Manasupe haus i op: Praim Minista Peter O'Neill i givim nupela nem long popula Painapel bilding i go long Sir Manasupe Zurenuoc taim ol opim long Trinde. O'Neill i sekhan long Manasupe long gutpela wok em mekim long tripela tem. Poto Nicky Bernard.



**Faster  
Higher  
Smoother  
Quieter**

## Daily Jet services to Alotau and Hoskins on the Fokker 70

Call Toll Free on 180 3444 or contact your nearest Air Niugini Travel Centre or Travel Agent.

**Air Niugini**  
www.airniugini.com.pg

# WINIM K1,000 MAMA FLAME MEKIM BILUM KOMPETISEN

Mekim bilum bilong yu yet wantaim Flame Flour mak. Postim foto bilong yu wantaim bilum yu karim na yu bai gat sans long winim. (Fopela inap long winim. Wanpela long wanwan region)

go to [flameflourpng](https://www.facebook.com/flameflourpng) on facebook



## O'Neill amamas long Nesenel Konvesen Senta

## O'Neill senisim ol minista



Praim Minista O'Neill wantaim ol opisal bilong Saina embesi na PNG gavman i lukluk raun long nupela Nesenel Konvensen Senta long Waigani las wik.

Praim Minista Peter O'Neill, i kisim wok bilong Minista bilong Autonomus Rijon bilong Bogenvil;

**PRAIM Minista Peter O'Neill i bin lukluk raun long nupela Nesenel Konvensen Senta long Waigani, Pot Mosbi na i bin amamas olsem dispela senta bai kamap wanpela gutpela ples bilong holim ol bikpela bung long bihain taim.**

"Bai mipela i holim tupela miting bilong APEC Trensposesen Woking Grup na APEC Binis Advaisori Grup long mun Epril.

"Stat bilong dispela projek i bin kamap aninit long lukautim bilong Sir Dokta Puka Temu. Bihain Charles Abel i bin lukautim. Na nau dispela projek i pinis wantaim lukluk na helpim bilong Justin Tkatchenko.

"I gat planti bikpela projek i kamap long kantri biklong yumi na dispela i opim planti sans long mekim bisnis na kirapim kantri.

bris, ples balus na sip bris, i wok long kamap long kantri bilong yumi,"Mista O'Neill i tok.

Mista O'Neill i tok ol dispela projek bai strongim kantri long gro na kirapim ikonomi long larim bihain taim bilong PNG i stap gut.

- Nixon Duban, i kamap nupela Minista bilong Trensposesen na Infrastraksa;
- Justin Tkatchenko, i kamap nupela Minista bilong Spots na Turisim;
- Steven Kamma, i kamap Minista bilong Helpim Praim Minista long ol Smting i karamapim Konstitusen;

Gavman bilong Saina i bin helpim Gavman bilong PNG long kirapim dispela nupela senta. Opisal openin bilong dispela senta bai kamap klostu taim tasol.

"Na long pinis bilong mun Me, mipela bai holim miting bilong Afrika, Karibien na Pasifik Het ov Stet na Heds ov Gavman.

"Mipela i tok tenkyu long Gavman bilong Saina long helpim mipela wantim dispela projek na poroman bilong mipela na Saina em i gutpela trip.

"Dispela i nidim gavman long senisim ol kabinet minista na larim gavman i stap gut long yusim ol dispela sans long kirapim kantri,"Mista O'Neill i tok.

Dispela senis bilong ol kabinet minista i lukim

Mista O'Neill i tok dispela liklik senis long kabinet posisen bai larim ol gavman i yusim gut save bilong ol dispela minista long ranim kantri wankain olsem ol narapela kantri i mekim taim global ikonomi i no stap gut.

Praim Minista O'Neill i bin go raun long hap long las wik Trinde long skelim sapos projek na konstraksen wok i pinis o no gat.

"Ol dispela miting i soim olsem kantri bilong yumi na ikonomi bilong yumi i wok long gro na poroman bilong yumi wantaim Esia-Pasifik i wok long gro tu," Mista O'Neill i tok.

"Taim Presiden bilong Saina i kam raun long PNG, mipela bai bungim em na holim miting wantaim em long dispela nupela senta," Mista O'Neill i tok.

Mista O'Neill i tok PNG bai lukim namba 2 LNG projek i kamap na Total SA, wanpela biknem petroleum kampani bilong Frans bai go pas long kirapim dispela projek.

- Praim Minista Peter O'Neill, i kisim wok bilong Minista bilong Autonomus Rijon bilong Bogenvil;
- Ben Micah, i kamap nupela Minista bilong Petroleum na Eneji;
- William Duma, i kamap nupela Minista bilong Pablik Entaprais na Stet Investmens;

"Dispela nupela Nesenel Konvensen Senta bai kamap ples bilong holim sampela ol bikpela bung long Pot Mosbi," Mista O'Neill i tok bihain long em i lukluk raun.

Praim Minista O'Neill i bin go lukim dispela ples wantaimambaseda bilong Saina Li Ruiyou, NCD Gavana Powes Parkop, na arapela 3-pela gavman minista husat i bin wok-bung long larim projek bilong dispela senta i kamap gut.

Dispela Nesenel Konvensen Senta bai holim ol APEC miting na arapela ol bikpela nesenel bung bikos em i gat gutpela na nupela samting long holim ol bikpela miting.

Em i tok ExxonMobil bai kirapim P'nyang gas fil long Westen Provins. "Plantu projek long kirapim ol infrastraksa bilong trenspot olsem rot,

Supporting PNG MADE

Trade-in price

**K19** only

- Bluetooth 2.1
- TFT 2.4" Display
- Memory extendable up to 8GB
- FM Radio
- VGA Camera

**Your poroman is now here**

Only on the friendlier network.

76003555 or 1555  
connect@bmobile.com.pg

www.bmobile.com.pg

# APEC bisnis manmeri bai kisim visa long ples balus



**OL bisnis manmeri i kam long PNG long ol APEC kantri bai kisim visa long ples balus, Praim Minista Peter O'Neill i tok.**

Mista O'Neill i mekim dispela toktok las wik taim em i bungim ol bisnis manmeri i kam long Filipin Sainis Semba ov Komes na Industri (CPC-CIS).

Ol dispela bisnis manmeri bilong Saina tasol husat i gat bisnis long Filipin i bin kam raun long PNG long mekim ol invesmen na bisnis tok-tok wantaim gavman bilong PNG na long painim sans bilong kirapim nupela bisnis long hia.

Las wik Trinde, Praim Minista O'Neill i bin bungim ol dispela bisnis manmeri long Pot Mosbi na i tok welkam long ol.

Mista O'Neill i tokim ol olsem PNG bai larim ol bisnis manmeri i kam long ol APEC memba kantri long kisim visa long ples balus.

Dispela bai larim planti ol bisnis manmeri i kam raun long PNG olsem turis o kam long hia long painim sans long inves na mekim nupela bisnis.

"Mipela i stap long wanpela rijon we yumi mekim ol samting long sapotim narapela i go kam, na PNG i stap long yusim sapot bilong ol kantri long Esia-Pasifik rijon long kirapim ikonomi.

"Mipela i laik tokim ol manmeri long narapela ol APEC memba kantri long kam mekim bisnis na kam raun long PNG.

Mipela bai larim ol i kisim visa long ples balus long PNG na dispela bai mekim raun bilong ol i isi tru," Mista O'Neill i tok.

Mista O'Neill i tok APEC Bisnis Travel Kad em i wanpela nupela kad we i mekim raun bilong ol bisnis manmeri na ol investa i kam long ol APEC memba kantri i kamap is tru.

Tasol i no gat planti manmeri i gat dispela APEC Bisnis Travel Kad. Dispela nupela disisen bilong gavman long larim ol APEC bisnis manmeri i kisim visa long ples balus bai larim planti manmeri i gat sans long kam raun long PNG.

"Mi amamas long yupela i bilip strong long ikonomi bilong dispela kantri na politikel stabiliti we PNG i gat. PNG i redi long kamapim pasin poroman namel long ol APEC memba kantri na mipela i opim kantri long larim ol nupela investa na bisnis manmeri i kam insiat long statim nupela bisnis long PNG," Mista O'Neill i tok.

Mista O'Neill i tokim ol olsem nau em i gutpela taim long inves long PNG bikos dispela kantri i gat gutpela politikel stabiliti na gutpela gavman husat i wok long sapotim ol bisnis.

"Mipela i amamas na tok welkam long ol memba bilong dispela semba long long kam raun long PNG. PNG i gat planti sans long kirapim bisnis na gavman i stap redi long sapotim ol long wanem ol eria ol i tingting long inves.

"Maski global ikonomi i lukim planti salens i kamap, ikonomi bilong PNG i wok long gro strong yet.

"Ol bikpela kampani olsem Total SA bilong Frans i bilip strong long ikonomi bilong PNG na ol i laik invesim bilien dola bikos ol i lukim olsem sans bilong mekim bisnis long PNG em i gutpela tru.

"Ol maining projek olsem Wafi-Golpu eksploresen, Frieda River Projek ana nau Papua LNG projek i wok long go het gut.

"Mi laik askim ol poroman bilong yumi long Filipains long wokbung wantaim ol kampani bilong PNG na inves long egrikalsa na piseris.

"Dispela bai kirapim planti wok, kirapim ol prosesin fasiliti, na helpim ol manmeri long kisim wok mani," Mista O'Neill i tok.

Filipin Sainis Semba ov Komes na Industri i gat 8-pela liklik opis long Filipins yet, na ol i laik opim nupela opis long Pot Mosbi.

Ol dispela opis i save lukautim ol bisnis sekta olsem egrikalsa, turisim, maining, pawa saplai, na liklik bisnis (SME).

Dispela grup bilong bisnis manmeri i bin kam raun long PNG bihainim invaitesen bilong Praim Minista Peter O'Neill.

Mista O'Neill i bin tokim ol long kam raun long PNG long painim sans bilong mekim bisnis taim em i bin go raun long Manila las yia long bung bilong ol APEC lida.



**Praim Minista Peter O'Neill i sindaun wantaim ol bisnisman bilong CPC-CIS.**

Long hankais: Praim Minista O'Neill i sekan wantaim wanpela bisnisman bilong CPC-CIS.

## Kumul Petroleum helpim 3-pela sariti ogenesesen



**Ol mausman bilong 3-pela sariti ogenesesen i soim wan wan K25, 000 sek ol i kisim long Kumul Petroleum.**

NESENEL oil na ges kampani bilong PNG, Kumul Petroleum, i helpim ol 3-pela non-gavman ogenesesen long skruim gutpela wok ol i mekim long senisim laip bilong ol manmeri long komyuniti.

Kumul Petroleum i givim K75, 000 long dispela tripela sariti ogenesesen; PNG Kensa Faundes, Cheshire Homes na Life PNG Care.

Wan wan sariti ogenesesen i kisim K25, 000. Dispela mani bai

helpim ol long mekim gutpela wok ol i mekim long helpim ol manmeri husat i gat sik kensa, i no gat papa mama na husat i disaibol.

Jeneral Menesa bilong gavman na komyuniti afeas bilong Kumul Petroleum, lan Marru, i tok ol i amamas long helpim ol dispela tripela sariti ogenesesen bikos ol i wok long mekim planti gutpela wok long helpim ol manmeri long kamapim gutpela sindaun.

"Kantri bilong yumi i wok long bungim planti hevi long ol helt isu olsem disabiliti na kensa. Namba bilong ol pikinini i no gat papa mama tu i wok long go antap taim papa mama bilong ol i kisim sik AIDS na i dai," Mista Marru i tok.

Mista Marru i tok Kumul Petroleum i amamas long helpim ol dispela 3-pela sariti ogenesesen bikos wok bilong ol bai senisim laip bilong manmeri na kamapim gutpela sindaun long dispela kantri.

Need a New laptop, Uniforms or Text books?

# BSP PERSONAL LOAN

STATIONERY

NEW UNIFORMS

COMPUTER

TRANSPORT

BACK TO SCHOOL?

www.bsp.com.pg [f](#) [t](#) [in](#)

# Praim Minista kisim luksave

**PRAIM Minista Peter O'Neill i kisim luksave long menesim ikonomi bilong kantri gut na long kirapim haia edukesen long PNG.**

Mista O'Neill i kisim dispela luksave taim ol i mekim em i kamap Felo bilong Institut ov Setifait Menesment Akauntents bilong Australia.

Dispela institut i gat gutpela poroman wantaim Jubilee Yunivesiti ov PNG, we AOG sios i ranim long Gerehu, Pot Mosbi.

Emeritus Profesa Janek Ratnatunga na DoktaThaddeus Kambanei bilong Jubilee Yunivesiti i givim wanpela awot long Mista O'Neill long wanpela seremoni long Pot Mosbi las wik.

Dokta Kambanei i tok ol i nominetim Mista O'Neill long kisim dispela awot bikos em i bin menesim gut ikonomi bilong dispela kantri, na tu em i bin sapotim nupela yunivesiti long kirapim na givim sans long ol yangpela

manmeri long kisim save na kamap gutpela manmeri long kantri.

Dokta Kambanei i tok lidasip bilong Praim Minista O'Neill i luksave long Jubilee Yunivesiti na tu i kirapim nupela Westen Pasifik Yunivesiti long PNG.

Mista O'Neill i bin amamas stret long kisim dispela awot.

"Dispela em i luksave bilong wanem samting mipela i mekim long larim ol pikinini bilong yumi i gat gutpela edukesen long dispela kantri.

"Fri edukesen polisi bilong gavman i larim moa long 1 milien skul pikinini i stap long skul nau.

"Bai mipela i kirapim ol fasiliti na ol samting bilong klasrum long olgeta level bilong edukesen na long tesiaeri level long larim ol yangpela manmeri na skul pikinini i no ken misim sans long go skul."

"Mi laik tok tenkyu long Jubilee Yunivesiti i givim sans long ol skul pikinini husat i no kisim



**Emeritus Profesa Janek Ratnatunga (Iephan) na DoktaThaddeus Kambanei bilong Jubilee Yunivesiti i givim wanpela awot long Praim Minista Peter O'Neill.**

ples long ol arapela yunivesiti. Gavman bai sapotim dispela patnasip namel long sios na dispela yunivesiti," Mista O'Neill i tok.

Long sait bilong ikonomi, Mista O'Neill i tok em i no wanpela isi wok long balensim ol wok na eria bilong yusim mani taim global

ikonomi i wok long go daun.

"Ikonomi bilong yumi i dabolim sais na i wok long gro yet. Maski global ikonomi i no stap gut, ol nambawan samting bilong ikonomi bilong yumi (olsem inflesen na foren risev) ri stap strong nana dispela givim mekim ol bis-

nis na foren invesa i gat bilip long ikonomi na kantri bilong yumi," Mista O'Neill i tok.

Long mun Oktoba las yia, Praim Minista O'Neill i bin kisim wanpela awot ol i kolim Honorari Doktret i kam long Soka Yunivesiti long Japan.

## OPENNING OF THE LEGAL YEAR 2016

Judges, Magistrates & Lawyers are to be robed for the service.

A Combined Police Correctional Service and Army Band will lead Judges, Magistrates & Lawyers from the main road at Ela United Church Hall, Kaugere to the Four Square Church, Kaugere.

There will be a combined Guard of Honor Parade to be inspected by his Honor, Chief Justice.

Refreshments will be available after the service, which is expected to finish by 10:45 am.

The Courts in Boroko, Port Moresby and Waigani will be closed during the morning.

Issued by:



**IAN AUGEREA**  
Registration & Sheriff  
Supreme & National Courts

**THE 2016 LEGAL YEAR CHURCH SERVICE WILL BE HELD AT THE FOUR SQUARE CHURCH – KAUGERE AT 9:30 AM ON MONDAY 1ST FEBRUARY 2016.**

**THIS IS AN ECUMENICAL SERVICE TO WHICH REPRESENTATIVES OF ALL CHURCH CONGREGATIONS & THE PUBLIC ARE INVITED TO ATTEND.**

**THE SERVICE IS FOR THE JUDICIARY AND LEGAL PROFESSION BUT MEMBERS OF THE PUBLIC ARE WELCOME TO JOIN.**

**THERE IS AMPLE PARKING AT THE CHURCH PREMISES AND THE MAIN ROAD.**

**National Judiciary service & PNG Law Society**  
**PHONE: 324 5868 / FAX: 325 7732**

### Praim Minista givim K5milien long ELCPNG

PRAIM MINISTA Peter O'Neill i bin kamap long taim bilong pasin Namba 30 Sinot bilong ELCPNG long Helsbach, Finsafen we moa long 2, 000 Luteran manmeri bilong Papua Niugini i bin kamap.

Praim Minista i bin kam wantaim ol arapela ol memba bilong Palamen olsem Spika, na Memba bilong Finshafen, Theodre Zurenouc, Memba bilong Kabwum, Bob Dadae, na Memba bilong Nawae Gisiwin Siniwit, Memba bilong Bulolo na Pangu Pati, Lida na Oposisen lida, Sam Basil, Memba bilong Tewai Siassi na Fiseris Minista Mao Zeming.

Long taim bilong pasim sinot, Mista O'Neill husat i wanpela strongpela Luteran i tok em i no laik lukim sios i sanap long politik na toktok long mani na kago we i ken bagarapim ol bilip manmeri na ol sios program.

Praim Minista i tok sios i mas sanap stret long autim Gutnius, na

i no bilong paulim na bagrapim samting bilong sios.

"Mi bin kamap long Karkar distrik, long 2014, na mi bin givim K10milien long sapotim ran bilong sios, nau gen dispela yia, 2016, hia long Finshafen sinot, mi givim K5m, long sapotim wok bilong sios. Mi laik lukim gutpela kaikai bilong wok sios mas kamap. I no long mi givim na i no gat kaikai bilong senis insait long EICPNG sios," Prai Minista i tok.

Mista O'Neill, i tok moa olsem sios na gavman i wankain tasol i gat narapela kain kain salens. Em i tok sios i mas mekim wok bilong long autim Gutnius, long strongim bilip bilong ol manmeri.

"Gavman bilong mi bai i go het long sapotim sios. Mipela sanap baksait wantaim bipo yet i kam, mipela sapotim ol sios woka long mekim ol wok bilong Helt na Eduksen na kain kain projek insait long ol rurel eria, na long komyuniti,"

### Morobe Gavana i tok taim bilong kamapim gutpela disisen

GAVANA Kelly Naru i mekim planti wok tru long sapotim ol wok bilong sios aninit long sios gavman patnasip program.

Em i bin givim han long 2014 nesene wokmeri konpens i bin kamap long EIC Boana Distrik, na nesene yut konpens long EIC Ukata Distrik. Em i no lus ting long sapotim nesene wokmeri konpens bai kamap long Is Simbu long dispela yia, 2016.

Em i tok gavman bilong em i givim moa long K200,000 long dispela Nesene Sinod na moa long K200,00. na baim lenkrusa long

mekim wok bilong sinot.

"Mi laik wok bung bilong sios na gavman, oltaim i mas istap long kamapim gutpela wok bung. Mi laik tok amamas long nupela ol lida bilong EICPNG, nau kamap we ol delegeit kam long 17 distrik i makim pinis.

Em plen bilong God yet, mi amamas long nupela yangpela bisop, Reveran Jack Uraime, husat i kisim ples bilong olupela Bisop Reveran Giegere Wenge. Mi laik tok moa long yu nupela lida, Reveran Uraime Luteran sios i stap long yu-pela lida na God.

# Grafiti i bagarapim pablik propeti long ol liklik taun

James G.Kila i raitim

**GRAFITI o pasin no gut long raitim o penim ol toktok o sain o piksa nabaut long ol pablik ples i no stap taso long Mosbi siti.**

Tude planti ol liklik taun na stesin long PNG i gat ol grafiti i stap pinis. Dispela ol grafiti i wok long bagarapim tru ol pablik samting na i mekim ples luk nogut stret.

Pastaim deputi Madang Taun Meya, Chris Tomong, i tok olsem gayman i mas putim strongpela lo long givim bikpela mekim save long ol lain i wokim grafiti o droim o penim ol samting long pablik propeti.

Ol dispela lain i soim bikhet pasin we i no bihainim lo na tu rispek long ol pablik propeti, olsem na ol i mas putim kamap lo long givim bikpela mekim save long ol lain i brukim lo na droim ol piksa o putim peint long ol pablik propeti.

Em i tok tude prais bilong ol tin peint bilong peinim ol haus i antap tru.

Dispela ol peint bilong peinim ol wol o banis raunim ol pablik propeti tu em prais bilong en i antap tru.

Tasol ol bikhet lain husat i no gat gutpela tingting i save go mekim pasin nogut long penim ol nem bilong ol na droim kain kain samting long wol bilong ol banis.

Mista Tomongo i mekim dispela toktok bikos pasin bilong ol yangpela man long wokim grafiti i wok long go bikpela tru insait long Madang taun. Ol dispela lain i wok long putim mak nating nating long ol banis na tu ol wol bilong ol banis long taun.

Em i tok polis i mas wokim wok raun na holim pasim dispela ol bikhet man na putim ol long kalabus bikos ol i bagarapim pablik propeti.



Dispela man Toby i no amamas long lukim ol grafiti long banis bilong MCC klostu long Handy Mart long Madang taun. Foto: James G.Kila

# Mis Pasifik i bungim ol sapota na sponsa

Esther Bralyn Wani i raitim

MIS Pasifik Ailan na Papua Niugini, Abigail Havora i gat sans long bungim ol sapota bilong em long The Edge long Pot Mosbi long las wik.

Patron bilong Mis Pasifik Ailan Pejen (MPIP), Linda Babao O'Neill, Minista bilong Spots na Ivents, Justin Tkatchenko, ol biklain bilong MPIP, ol sponsa na ol sapota i go long bungim Mis Pasifik.

"Taim mi go long Cook Ailan, mi mekim olsem bisnis bilong mi long olgeta introdaksen bilong mi long



MIS Pasifik Ailan na Papua Niugini, Abigail Havora.

tokim ol pipel long wanpela sotpela toktok long PNG. Long dispela, olgeta taim

mi go long toktok ol i lainim nupela samting long kantri bilong yumi," Miss Havora i tok.

Mis Havora i tok raun bilong em long Cook Ailan i bin gutpela tru na em i tok tenkyu long ol pipel husat i sapotim em. Em i tok 50 pesen bilong win i kam long em yet na narapela 50 pesen i kam long ol pipel husat i kirap wantaim em long traipela moning, komim gras bilong em, mekim ol bilas bilong em na pre wantaim em.

Long wankain taim, Wantok Niuspepa i askim em long wanem as em i bin

makim tupela meri, Kwin Salotaire na Dame Mag Taylor long win toktok bilong em long Cook Ailan.

Em i tok het tok bilong presentesen bilong en em long lida meri long wanem ol i makim tupela meri we i kam ausait long ol bikpela banis na mekim planti tenis long kantri bilong tupela.

'Kwin Salotaire i bin mekim bikpela samting taim em i abrusim kolonaisesen taim em i bin go woa o pait i bin go bikpela long dispela taim. Mi makim em bai ol meri i lukim olsem sapos em i ken sanap strong na pait long kantri

bilong en, yumi tu i ken mekim olsem,' Mis Havora i tok.

'Long wankain taim, Dame Mag Taylor i bin gro long hap we ol meri i no save sanap long toktok tasol em i kamap olsem wanpela lida na go long bikpela institutsen long Harvard na kamap Wais Presiden bilong Wol Benk em i bikpela samting tru,' Mis Havora i tok moa.

Em i tok dispela i soim olsem ol meri i no larim ol hap o komyuniti ol i bin stap kontrolim ol tasol ol i kontrolim ol komyuniti na ol i bin bilip long ol yet.

# Pomio laikim gutpela rot

Michael Novingu i raitim

Singaut i go long bikpela gavman long wokim rot i go long saut kos Pomio long kam bung wantaim Kokopo long kisim ol sevis i go long ol manmerii long hap.

Memba bilong Pomio, Elias Kapavore, i askim bikpela gavman long stretim rot long saut kos Pomio na wokim ol arapela samting bai kisim sevisi i go long ol manmeri long hap, na kirapim gutpela sindaun bilong ol.

Kapavore i tok em i no gutpela pasin taim gavman i no wokim rot long bungim Wes na Is Nu Briten.

Em i skruim tok i go moa na tok gavman i lus ting ting long Pomio distrik we ol manmeri i stap tarangu yet.

Em i tok bikpela gavman i no mekim wanpela samting na Tsang Niugini na Rimbunan Hijau grup kamapani nau i wok long stretim rot long kisim sevis i go long manmeri long dispela hap.

Kapavore i tok em i laikim sapot bilong bikpela gavman long wokim rot long ol distrik bilong em long bungim Kokopo and ol arapela distrik long Is Nu Briten.

Em i tok Pomio distrik i gat planti risos i stap long kirapim gutpela sindaun long ol pipel bilong Pomio. Em i singaut long gavman long helpim long kirapim gutpela sindaun bilong ol.

# Reveran Wenge tok amamas long yangpela bisop

LONG pinis bilong makim nupela het bisop bilong ELCPNG long Januari 15, olupela het bisop Reveran Giegere Wenge i tokim bilip man meri olsem ol i mas amamas long nupela het bisop, husat i yangpela man na i bihanim sinagut bilong Bikpela long kamap lida.

Em i tok, "Yumi i no ken tok tok nabaut long bagarapim bilip bilong yumi Kristen olsem man Hailans i kisim nem Bisop. Dispela man em makim ELCPNG, na yumi mas amamas long nupela lida bilong sios, husat bai makim yumi 1.5 milien Lutheran.

"Mi amamas olsem disepla wokabout bilong sios lukim yupela ol nupela lida, olsem namba 2 Bisop, na sekretari, mi bilip bai long wok bung bilong yupela inap long bringim sios i go long narapela level."

Em i tokim ol nupela yangpela lida long sanap wantaim ol arapela lida insait long sios na sanap antap long wokabut bilong Gut-



Praim Minista sanap wantaim olupela Bisop i givim tok bilong gavman sios mas wok bung na em givim 5 milien Kina long sios long kirapim Siping sevises.

nus, insait long tok bilong God.

Em i tok long tok bilong God tasol bai senis inap kamap na kaikai bilong blesing inap kamap insait long sios

Nupela bisop, Reveran Jack Urame, husat i bin pastor long St John peris, long wes Goroka, i wok wantaim Melanesian Institute, olsem wanpela risets opisa. Em i bilong Dom, long Is Simbu Lutheran Distrik, long Simbu provins.

Em i tok tenkyu long papa God, na holi spirit long stap wantaim ol Kristen bilip man meri, na ol i makim em na nupela jeneral sekeri, Bernard Kaisom, bilong ELCPNG, Karkar Distrik, na nupela namba 2, bisop, em bilong Wantoat insait long EIC Yabim Distrik, na em tu i olupela prinsipal bilong Logaweng Seminary, Finshafen.

Reveran Urame, i tok, "Mi bilip olsem mipela 3-pela em ol nupela,

na bai mipela inap holim han wantaim na long nem bilong bikpela Jisas, bai mipela lukluk long wok sios, na strongim gen wokabut bilong wok Gutnius, long bringim ol bilip man meri bilong Lutheran sios i mas save EICPNG bai sanap antap long strong bilong Gutnius, tru long tok bilong God tasol."

Olgeta Kristen long sinot, long 17 distrik i amamas long lukim olsem sios gat nupela ol lidas, na bai lukluk moa long nupela senis i kamap, na sios mas kamapim moa nupela straksa na plen bilong vision 2020, i go het bihanim wokabut bilong sios. Wantaim strong bilong Bikpela Jisas, sios mas lus ting long politik, na em i mas sanap antap long Gutnius tasol na bai em lukim blesing bilong wok ministri tru long tok bilong God.

Reveran Wenge, tokim Reveran Urame na ol nupela lida long klinim hevi long Ampo, na mas toktok moa long stretim gen ran bilong Lutheran Siping.

# UN i givim Felosip program long ol niuslain

**YUNAITET Nesen (UN)** i askim ol yangpela Papua Niugini jenelis o ripota na ol brodkasta long kantri na aplai long gat sans long stap insait long wangepa mun Felosip program long UN hetkwata long Nu Yok long pinis bilong dispela yia.

Dispela Reham Al-Farra (RAF) Memorial Journalists Fellowship Programme i op long ol jenelis na brodkasta i gat krismas namel long 22 na 35. Em bai givim ol bikpela ekspirians long lainim ol nupela

samting na sans long wok bung wantaim 15 narapela ripota na brodkasta long wol.

Ol kendidet i mekim gut bai go stap 4-pela wik long hetkwata bilong UN long Nu Yok we ol bai gat sans long lukim wok bilong Yunaitet Nesen na lukim ol global lida i wok long 71 UN Jenerel Asemblbi. Em i wangepa sans long bungim ol jenelis long ol narapela kantri na senisim ol tingting wantaim ol UN komyunikesen profesenel.

'Felosip Program i givim wan-

pela gutpela lainim na netwok ekspirians bilong ol yangpela media woklain. Em i gutpela sans long lukim UN i save operet long global level na konekt wantaim ol narapela media lain long wol.

Mi laikim ol yangpela PNG media lain long aplai long dispela gutpela sans na ol pipel i aplai las yia long aplai gen,' Residen Kodineta bilong UN long PNG, Roy Trivedy i tok.

Dispela Felosip program bai i kamap long Fonde Septemba 8 inap Trinde Oktoba5 long dispela

yia na bai givim ol kendidet wantaim wangepa ikonimi balus tiket i go long Nu Yok, alauens long karamapim rum, kaikai, lokol trenspotesen na ol narapela samting. Ol i pinisim dispela program bai kisim setifiket long soim olsem ol i stap insait long dispela program.

Dispela Felosip Program i gat kain kain aktiviti long wok wantaim UN media woklain, stap insait long ol aktiviti, tupela de akedemik woksop long yunivesiti long Nu

Yok, raun lukim ol bikpela media ogenaisesen na lukim ol wok bilong ol non-gavman ogenaisesen.

Ol nius ripota i stap insait long dispela program i mas go bek long kantri bilong en na raitim stori bilong putim long pepa, tv o radio.

Ol i kisim nem bilong program long tingim Reham Al-Farra, wangepa yangpela UN wokmeri husat bin dai long 2003 taim ol i bomim Hetkwata bilong UN long Baghdad.

Eplikesen bai pas long Tunde long namba wan de bilong Mas.

# Raun isi na kisim win long Adventure Park

## Ol poto na stori Anna Solomon

MOSBI siti em i wangepa drai ples we i no gat ol naispela hap long raun isi na kisim win. Yu ken go raun long Ela Bis tasol ai bilong yu bai les long lukim ol pipia i pulap long nambis o ol manmeri i raun i go kam salim kaikai o buai na smok. I no gat gutpela ples bilong sindaun isi na pulim kol win i kam long solwara, bikos bikrot i stap klostu na nois bilong ol kar bai pasim yau.

I tru i gat wangepa naispela ples long yunivesiti gaden ol i kolim Nature Park. Tasol ol diwai i pasim ples na i no gat bikpela spes long raun.

Olsem na sapos yu laikim bikpela spes bilong wokabout raun na lukim ol naispela plawa na diwai na ol enimal, orait draiv i go aut long 14 mail we wangepa naispela ples bilong limlimbur i stap, ol i kolim Adventure Park.

Dispela naispela ples we ol famili o bikpela grup i ken go piknik na



Ol giaman elefen na taiga bai pulim ol pikinini.

amamas i stap autsai tasol long siti. I gat ples we ol pikinini na ol bikpela manmeri tu i ken go long wara slaid na swim. Sapos yu laik raun long liklik kanu o kayak, orait yu ken baim na pinisim laik. I gat ol haus wantaim ples bilong babakiu

na ol sit we yu ken sindaun isi, kisim win na harim kraik bilong ol wail pisin.

Sapos yu wangepa man o meri i laikim tumas ol plawa na diwai, bai yu ai op long lukim kain kain diwai na ol plawa i gro long hap. I gat seksen bilong ol enimal tu i stap. Ol pikinini i save amamas long wokabout raun na lukim ol meme na sipsip na ol pukpuk na kakaruk na pato na ol sikau bilong diwai na ol pisin.

Olgeta wiken ol famili na ol bikpela grup i save go aut long Adventure Park long wokim liklik bung kaikai o selebretim betde bilong ol pikinini o raun tasol long amamasim ol yet. Sekyuriti long



Ol pikinini amamas long wara slaid.

dispela hap i gutpela tru na em i seif long raun na lukim ol naispela samting insait long park.

Long Desemba, i bin gat wangepa betde bung bilong pikinini bilong susa na mipela ol famili i bin go selebretim long hap. Mi kirap nogut long lukim planti ol PNG famili na ol ovasis manmeri na ol pikinini i pulim lain i go long dispela park.

Em i fri long go insait long park na raun nating. Tasol sapos yu laik bukum spes bilong babakiu long wangepa haus, o go lukim okid gaden o go long wara slaid, o merigo-raun, o raun long kaiyak, o raun long tren, bai i gat liklik pe long en. I gat lista bilong hamas mani yu

mas baim i stap long geit we yu inap lukim long taim yu kam insait long park.

Sapos yu no karim kaikai i go na yu hangre, orait i gat Big Rooster i stap insait long park long stretim bel bilong yu.

Liklik tren i save karim ol pasindia i go long seksen ol i kolim Jurassic Park we i gat ol giaman dainaso i sanap i stap. Ol pikinini i save resis long raun long dispela tren bikos ol i klia long stori bilong dainaso long muvi ya, Jurassic Park.

Adventure Park em i wangepa naispela ples bilong malolo na kisim win na amamas wantaim ol famili o ol pren husat i kam lokal turis long Mosbi. Goan, yu yet kam na lukim!

## PNG Nesenel Komisin bilong UNESCO i sapotim Tonda olsem Wol Herites

EKSEKETIV Dairekta bilong PNG Nesenel Komisin bilong Yunaitet Nesens Edukesenel, Saintifik na Kalsarel Ogenaisesen (UNESCO), Andrew Angobe i sapotim tingting bilong Minista bilong Turisim na Spot, Justin Tkatchenko long rekomendim Tonda Wailaip Menesmen Eria long Westen provins long Wol Heritej Listing.

Mista Angobe i sapotim toktok bilong Minista Tkatchenko na Praim Minista Peter O'Neill olsem Tonda bai kisim luksave olsem intenesenel, na hap bai ol i lukautim.

UNESCO i kirapim Wol Heritej Komiti (WHC) we em bai givim tok orait long kain hap bai stap long Wol Heritej Lista.

Mista Angobe i tok moa olsem wangepa gutpela rilesensip long wok wantaim gavman, ol stekholda, ol NGO na intenesenel ejensi, putim Tonda long lista olsem Wol Heritej (WH) hap i ken kamap gut.

Graun bilong Tonda i pulap long

wara na Wailaip menesmen Eria we i karamapim 590,000ha na haus bilong wangepa bikpela ekosistem long graun i gat olsem hap bilong ol populesen bilong pisin long PNG. Populesen bilong pisin i ken bungim Wol Heritej nominesen kraiteria tasol olgeta proses bai kisim taim, bikpela wok, na ol risos long husat ogenaisesen i gat intres.

Long wankain taim, Nesenel Komisin Opis i toktok pinis long wari bilong ol wantaim Nesenel Heritej Seketeriet bilong Konsevesen Envairomen Proteksen Atoriti (CEPA) na wantaim intres ol i soim long politikel level long rekomendim Tonda long stap long lista bilong WH.

Em i tok long wok bung wantaim ol gutpela stekholda, plant hap i ken stap long lista bilong Wol Heritej Lista. Dispela em i wangepa sans bilong promotim bikpela netsurel na kain kain daivesiti long wol we i gat bikpela strong long apim turis bisnis.



Liklik Julius i pilai long baksait bilong taiga.

**Make  
safe  
choices  
about alcohol.**

## Dring bia tumas bai yu gat ol dispela sik

KENSA – Sapos yu dring tumas Alkohol o bia yu inap long kamapim sampela kensa long maus, nek paip, bel, liva na bros. Birua long kensa i no inap kamap tasol taim yu dring planti bia tumas. Em i ken kamap sapos yu dring liklik tasol tu. Tasol yu dring moa, yu putim yu yet long hevi moa.

Wok bilong lewa na ron bilong blut long bodi – Alkohol inap long kamapim hai blut pres (hypertension), we em i save kamapim gutpela rot bilong wanpela man o meri inap long kisim hat atek o hap indai. Em i save slekim masol na dispela inap long bagarapim ol lang o win bek, liva, kru bilong tingting na ol narapela sistem bilong bodi. Dring amamas long bia pati na pasin bilong dring bia longpela taim inap senisim mak bilong lewa pam long salim blut na win bilong bodi i go i kam. Dring nating, nating na dring tumas bia longpela taim i save mekim lewa long senisim pam bilong em na em i save kamapim dai.

Lang o win beg – Ol pipel husat i save dring tumas bai lukim lang bilong ol i stop long wok na ol inap long kisim sik numonia.

Liva – Dring tumas bia o planti bia tumas bai kamapim Alcoholic Hepatitis (liva solap), bai mekim liva i stop long wok, kensa kisim liva na kamapim dai. Em i isi moa long ol meri long kisim sik long liva bikos long bia ol i save dring.

Bikpela bel – Alkohol inap givim bel pen, traup, pekpek wara, sua long bel, blut ron long bel, bel i hat long brukim kaikai gut na kamapim rot bilong kisim kensa.

Pancreas – Ples bilong brukim bikpela kaikai i go liklik long go aut long as bai solap na inap kamapim dai.

Bel rop – Bikpela dring inap long kamapim alsa na kensa long bel rop na stopim bodi long kisim gutpela nutrient na vitamin long ol kaikai.

Kitni – Dring planti inap long bringim blut presa i go antap na kamapim sik long kitni.

Ol bun – Alkohol i save pasim rot bilong bodi long kisim kalsium we i save mekim bun i strong olsem na ol bun bai kamap slek na bun nating. (osteoporosis).

Kamap pat o gat planti gris – Alkohol i gat planti gris na em i ken mekim man i go bikpela tumas na hevi tumas long bodi.

Seksuel Helt – Dring nabaut, nabaut inap paulim tingting bilong man na meri na ol i slip nabaut wantaim ol narapela man na meri we ol inap long kisim ol sik nogut olsem klamidia, HIV na tu meri inap kisim bel nating. Ol man inap long mekim skin bilong man i les na i no inap long kamapim pikinini na tu ol meri bai i no inap long karim pikinini. Ol bel mama na ol meri husat i laik gat bel i mas no ken dring.

Banis bilong bodi – Dring tumas bai mekim banis bilong bodi i no gat strong long daunim ol bikpela sik i kam long bodi.

Helt bilong tingting – Planti lain i save ting olsem Alkohol o bia bai rausim ol hevi long tingting bilong ol tasol em i no tru. Em i tru olsem Alkohol i save kamapim moa hevi long tingting na givim moa wari na bagarapim long ol man na meri.

Slip – Dring tumas inap long bagarapim we bilong slip na bai painim hat long slip. Dispela ken kamapim tingting planti, na wari.

Tingim: Sapos yu no pilim olsem yu laik dring gut, em i minim olsem yu mas go lukim sampela lain long helpim yu, kain olsem wanpela dokta long ol lokal Eben klinik bilong yu.

# Kikori Haus sik kisim nupela embulens

EXXONMOBIL PNG Limited (EMPNG), mama kampani bilong PNG LNG projek i givim wanpela nupela embulens i gat olgeta samting bilong helpim sikman, i no longtaim i go pinis.

Long taim bilong givim aut dispela embulens, EMPNG Komyuniti Developmen Sapot Analis, i tok, “ExxonMobil i luksave olsem long ol sitisen o ol manmeri bilong dispela kantri i stap helti na ol i kamap hap bilong gro na developmen bilong kantri, em i gutpela long putim investmen i go insait long ol helt program long kamapim gut laip bilong ol pipel insait long ol komyuniti em i wok long en.

Kikori Rurel Haus sik i stap long Galp Provins aninit long Galp Kristen Sevis. Em i save gat 30 sikman na meri i slip insait long haus sik long wan wan mun.

Haus sik i save givim namba wan helt sevis long sekim ol sikman na meri. Tasol sapos ol sikman i nidim moa helpim ol i save salim ol i go long Mendi Haus sik long Sauten Hailans Provins na Kerema Haus sik long Galp Provins.

Kikori haus sik i save helpim moa long 20,000 pipel bilong Kikori na ol narapela komyuniti i stap klostu olsem long Gobe na Samberigi long Sauten



EMPNG Wara antap Komyuniti Developmen Sapot Analis, Maraki (hansut) i givim embulens ki long Edministreta bilong Kikori Rurel Haus sik, Larry Kaipu long ai bilong ol wok lain bilong EMPNG na Kikori haus sik.

Hailans Provins. Haus sik i no bin gat embulens long 11-pela mun olgeta.

Maraki i tok moa olsem, “EMPNG i bilip olsem dispela embulens bai mekim wok bilong helt sevis i kamap isi long ol siklain na tu long ol wokman na wokmeri bilong haus sik long taim bilong imejensi.”

Kikori Rurel Haus Sik Edministreta, Larry Kaipu i tok nupela embulens bai helpim ol long wokim gen ol wok bilong helpim ol siklain husat i nidim helpim hariap.

Em i tok tenkyu long

EMPNG long dispela embulens na tu long sapot bilong ol long haus sik insait long planti yia i go.

Ol helpim olsem wara tenk, haus sik matres bilong slip na mentenens long haus sik.

Bikpela hap bilong Kikori Rurel Hau sik sevis em i lukluk long tritmen na long stopim tubekulosis bihain long ol i bin painim planti TB long hap we PNG Institut bilong Medikal Risets (IMR) i bin wokim stadi long en wantaim helpim bilong EMPNG.

Long kirap bilong las yia,

kampani i bin helpim haus sik wantaim mani bilong wokim wanpela medikal autris i go long ol ples klostu long awenes na sekap bilong sik TB na bilong luksave hariap na givim marasin.

“EMPNG i helpim wantaim mani bilong daunim sik TB program long 2015 na ol i lukim planti gutpela senis i kamap na long dispela ol pipel bilong Kikori na haus sik wokman na meri i gat bikpela amamas na tenkyu long kampani ExxonMobil long sapot bilong en”. Kaipu i tok.

## Marasin bilong taunam bai stopim malaria

**James G. Kila i raitim**

OL pipel bilong 24 hauslain long Saut Ambenob LLG long Madang distrik nau i ken stap bel isi na i no pret long moskito long nait taim bikos nau ol i gat ol taunam o moskito net we i gat marasin long kilim natnat o moskito.

Dispela gutpela nius i kamap bihain long wanpela program we ol lain i wasim na putim nupela marasin gen long ol olpela moskito net na ol arapela we i nogat marasin long ol.

Ol dispela marasin bai stopim moskito long go klostu long net long nait na kaikai ol lain i slip long bet.

Program ya i stat long 11 Januəri i go long 26 Januəri na i karamapim ol bikpela viles olsem Yabob, Gum, Mauban, Kesup, Sinem, Danben, Bilibil, Hod na Baor.

Ol manmeri long ples i amamas tru long dispela

gutpela net program bikos em i namba wan taim tru long lukim kain helpim olsem i go daun tru long viles na hauslain level.

Dispela program long tritim o putim marasin gen long ol taunam bai helpim banisim ol liklik pikinini long no ken kisim sik malaria.

Man i kamap wantaim dispela gutpela tingting em pastaim PNG Red Cross opisa, Tarcissius Basse.

Mista Basse i tok ol viles na hauslain komyuniti stat long Yabob i go long Baor viles i amamas tru long dispela program bikos em bai banisim ol long ol i no inap kisim sik malaria.

Em i tok olsem dispela



Tarcissius Basse i putim marasin long moskito net long Saut Ambenob LLG

program em Memba bilong Madang na Minista bilong Transpot, Nixon Duban i putim mani mak olsem K22,000 long helpim.

Na Mista Basse i kamap wantaim gutpela tingting long helpim ol Saut Ambenob viles na ol hauslain komyuniti.

Em i tok ol manmeri i amamas tru bikos planti ol moskito bilong ol i nogat marasin bilong banisim

malaria, na sampela em ol olpela moskito net we strong bilong marasin em pinis.

Mista Basse i tok em i kisim 18-pela yangpela man long helpim em long dispela moskito net triting program.

Program i lukim ol i baim ol strongpela kemikel o marasin na wasim na givim strong long moskito net.

# Trukai i trupela singaut bilong Anne Kewe

**TAIM i kam klostu long Trukai bai kisim gol eniveseri bilong en olsem wanpela kampani insait long Papua Niugini.**

Na wanpela klia mak bilong gutpela histori bilong en insait long kantri em ol wokman na wokmeri bilong en.

Wanpela wokmeri, Anne Kewe em i wanpela meri we i bin stap longpela taim tru wantaim Trukai.

Em i bin statim wok bilong en wantaim kampani bihain tasol long em i bin pinisim seketeri trening bilong en long Lae Seketeriel Koles long 1980.

Em i kisim kainkain wok insait long Trukai na long Tunde 19 Januari, 2015 em i kisim 35 yia bilong em bihain long namba wan de em i bin statim wok wantaim kampani.

Misis Kewe i lukim pasin bilong wok longpela taim i stap insait long famili bilong en.

"Ol famili pren na lain bilong mi i tok mi bihainim lek mak bilong papa," em i tok.

"Papa i bin wok wantaim Telikom winim 30 yia pastaim long em i ritaia na mi save lukim em olsem gutpela piksa bilong mi long bihainim. Mi pilim olsem mi laik soim olsem wanpela meri tu inap long stap longpela taim olsem long wanpela wok.

"Wok bilong mi wantaim Trukai bren na we mi go insait na wok i mekim mi pilim olsem mi stap gut na i no gat pret na i helpim mi long kamap long dispela kain taim. Mi bilip olsem Trukai em bai namba wan bos bilong mi na tu laspela bos bi-



**Misis Anne Kewe – Human Risos Kodineta bilong Trukai Limited.**

long mi pastaim long mi pinis long wok olgeta." Misis Kewe i tok.

Anne i statim wok long 1981 olsem wanpela seketeri bilong Distribusen Menesa pastaim long em i kamap risepenis long 1983. Bihain em i go long wok olsem wanpela ilektronik Data Prosising Klak inap tupela yia.

Em i tok dispela em i wanpela gutpela taim insait long wok laip bilong en, we em i save laik long tingim yet.

"Taim mi kisim wok olsem EDP klak long 1985 em i bikpela samting bikos Rais Industri Pty Limited (naw Trukai Industri Limited) i bin bringim wanpela namba wan kompiuta bilong ems tret i kam insait long bisnis. Mi pilim olsem mi laki meri stret long kamap namba wan meri insait long bisnis long wok wantaim dispela kompiuta,"

em i tok.

Em i bin wok tu olsem Supaveisa (1997-1998) bilong Akaun na Pe mistres na seketeri bilong na Kampani Seketeri.

Insait long ol 30 yia i go em i bin wok wantaim Human Risos long Perol long 2006 i go long 2007 na Human Risos Sapot long 2007 i go long 2011 bihain long em i kisim promosen i go long Human Risos Kodineta long yia 2013.

Em long hap nau em i kisim sia bilong Emplo Benefit Kodineta we nau em i stap long en. Em i tok i bin hat long kalap i go i kam long wok insait long kampani tasol i gat gutpela kaikai bilong en.

"Wanpela salens long mi em long taim bilong senisim ol teknoloji," em i tok.

"Mi painim olsem taim ol nupela sefti lo i kamap, mi

bin painim hat long bihainim. Tasol nau mi tok tenkyu long Trukai long putim sefti na gutpela sindaun bilong ol wokman na wokmeri namba wan samting." Anne i tok.

Ausait long wok, laip bilong Anne i bin wankain tasol olsem long wok ples.

Bipo em i bin kamap olsem Mis Morobe olsem na em i gat strongpela famili baksait long em long em i kamap wanpela strongpela meri bilong wok bilong Trukai.

Em i marit na em i gat wanpela pikinini meri, na tupela pikinini man.

Misis Kewe i bilip olsem ki samting long strongpela wok laip balens em long mekim gut wanem kain wok yu mekim, na maski wari long wanem kain sindaun yu gat.

"Gutpela tok stia mi bai givim em long yu mas olgeta taim i gat gutpela tingting long yu yet na tenkyu long yu em wanem kain meri," em i tok.

"Mi laikim ol yangpela meri husat i pinisim ol skul bilong ol i mas luksave olsem edukesen em i wanpela hap bilong kamap gut na strongpela tingting em i gutpela samting long gat long kain taim olsem." Em i tok.

Sapos yu no inap long painim wanpela wok, mi laik tok strong long yu long no ken les tasol taim yu kisim wok, yu mas lukautim gut. Stap wanbel wantaim kampani, tingting strong long gutpela wok wantaim gutpela balens laip bai kisim yu i go long wanem hap yu laik go long en insait long wol." Misis Kewe i tok.

## Meri winim trip i go long Fiji

SERAH Kori Ranu em i laki PNG wina bilong "Winim Trip i go long Fiji" we, Paradise Beverages i wokim insait long taim bilong Krismas. Serah i bin baim wanpela botol wara bilong Gutpela Wara bilong Graun "FIJI WARA" na em i go insait long dro.

Mis Ranu i bin amamas tru taim em i harim olsem em i win. Dispela win prais em i gat wanpela trip bilong tupela lain i go long Fiji, wantaim K1000 kes mani, na sans long go lukim ples we ol i kisim, FIJI WATER.

Serah i autim bel amamas bilong em long Paradise Beverages long ol i kamap wantaim dispela kain promosen, na em i tok tu olsem dispela i mekim gutpela we long em i



statim nupela yia.

Paradise Beverages Marketing Menesa, Jessica Kuamba i tok amamas long Mis Ranu na em i tok, Paradais Beverage em i wanpela trupela

PNG kampani we i save stap pas wantaim ol kastoma bilong en olgeta taim, na em i save soim amamas bilong en long ol kastoma bilong en planti taim wantaim ol

kainkain promosen na ol ofa.

Jessica i tok moa olsem Paradise Beverages i gat plen nau long wokim moa bikpela na gutpela promosen long dispela yia.

## Sampela ol Tingting bilong Meri

### Program bilong wok gaden na gutpela kaikai

DiSPELA wik bai mipela i statim nupela kolom bilong ol meri na yut. Mipela i kisim dispela ol tok tok long Stori na Wok buk we Elizabeth Cox i raitim long givim sampela tingting long ol meri i go pas long ol bung bilong ol meri.

Planti klap bilong yumi i no save ran gut tumas. Yumi save sot long 'aidia' bilong wok na sampela i save les. Planti klap nabaut i no gat as tru bilong bung bilong ol. Sampela ol i bung long stori nating, sampela bung long pilai spot, na sampela i save bung na oltaim samap, samap tasol.

Pilai spot, samap na maus wara stori nabaut em i gutpela samting tasol ol no nambawan bikpela wok bilong yumi ol meri na mama long Papua Niugini. I no gat samting tru i kamap long dispela wok. Em i kain sindaun bilong ol manmeri long i stap long taun, we ol i nogat graun bilong wok, na ol i mas baim kaikai long stua na tu ol i no gat samting bilong mekim, na skin i les na ol i hat long painim wok bilong ol klap.

Dispela stori em i no stori bilong ol meri i save les long strongpela wok. Em i stori tok save long ol meri i gat bun, na i gat namba tru long kamapim wok developmen.

Oltaim, oltaim yumi save harim tupela kain tok tok long ol grup bilong ol meri. 'Wok developmen' na 'Wok bisnis'.

Long tingting bilong mipela yet dispela tupela toktok i no wankain. Long Papua Niugini yumi gat bikpela trabel long kamapim inap kaikai, na painim gutpela kaikai bilong givim long famili.

Lukluk gut insait long klap bilong yu yet, Hamas mama i bun nating?, Hamas pikinini bilong ol i bun nating, Hamas taim ol pikinini bilong ol memba i save sik nabaut?, Hamas taim ol man bilong ol i save paitim ol bikos ol i no gat gutpela kaikai long haus?, Hamas taim ol mama save hangre?

Lukluk gut long sindaun bilong yumi. Wanem samting i moa bikpela? Wanem samting i wok gut? Yumi ken amamas long samapim wanpela bilas, o pilai spot, tasol olsem wanem sapos planti mama wantaim famili bilong ol i sik na hangre nabaut?

Sapos wanpela yangpela skul liva meri i stap insait long klap na em i save samapim naispela dres, na bilas gut, tasol em i slip long rabis haus, na haus i no gat gutpela toilet em i no developmen tru.

Yumi mama i gat planti wok long skelim gut sindaun bilong yumi wan wan, na long kamapim nem bilong ples bilong yumi.

Wanem samting i moa bikpela long yu? Smatpela dres o gutpela kaikai? Kain kain bilas long haus o gutpela toilet?

Sampela klap ol i tok mipela i wok bisnis. Ol i kukim o samapim samting na salim. Mani ol i yusim long baim ol samting bilong pati. 'Bisnis' i no kamapim sindaun bilong ol.

Olsem bikpela as toktok long dispela stori em olsem. Klap i ken mekim wok tru insait long developmen sapos ol i lukluk gut long ol wari tru bilong sindaun bilong ol memba meri. Ol meri no ken sem long wok gaden. Insait long wok developmen – gavman bilong yumi i save apim tru nem na namba bilong wanem meri i win long kamapim gutpela gaden na moa kaikai.

Sapos yu wok gaden wantaim klap bilong yu, yu mas kamapim kaikai pastaim long ol memba yet, na ol famili bilong ol yet long kaikai.

Nogut yu wok gaden long bisnis tasol na ol memba na pikinini bilong ol i hangre.

Sapos yu salim gaden kaikai bai yu baim wanem? Sispop, loliwara, swit basket. Yumi olgeta save pinis. Kain kaikai bilong stua olsem ol dispela samting, i westim mani, bagarapim bodi na tit bilong pikinini.

Orait, sapos yu bilip long tok bilong mipela, na sapos yu gat laik tru na wok long dispela wok insait long klap bilong yu, mipela i ken helpim yu.

Painim aut ol 18 liklik stori long helpim yu long neks wik.

**Mis Ranu kisim prais tiket bilong tupela lain long go long Fiji i kam long Paradise Beverages, we Maketing Menesa, Jessica Kuamba i givim. Foto: Paradise Beverages Maketing**



# Yunaitet Sios Asembli selebretim 48 yia eniveseri

Frieda Sila Kana i raitim

**YUNAITET Sios bilong Papua Niugini i bin selebretim luk-save long de bilong ol tripela misineri sios i bin bung wantaim 48 yia i go pinis, long Tunde 19 Januəri.**

Nesenel Asembli Opis i bin redim wanpela lotu na bung long Sioni Kami Memoriel Sios (RSKMC) long dispela de wantaim sampela lain husat i makim ol lotu grup bilong wan wan rijon we i stap insait long Pot Mosbi Siti.

Long Sande 17 Januəri, Asembli Opis i bin salim wanpela toksave i go aut long ol wanwan kongrigesen bilong Yunaitet Sios long ol i holim lotu bilong ol yet wan wan.

Long dispela taim Asembli Seketeri, Uvenama Rova i tokim olgeta lain Minista na ol pasto wantaim ol lain husat i kamap long Reveren Sioni Kami Memoriel long givim ofa bilong dispela de i go long RSKMC.

Dispela de i makim taim we ol lida bilong London Misineri Sosaiti wantaim, Methodist Sios bilong Australia na Papua Ekalesia i bin bungim tingting na kamapim wanpela sios tasol. Long 1996 ol i bin kolim dispela sios, Yunaitet Sios bilong Papua Niugini.

Pastaim Modereta bilong Yunaitet Sios, Reveren Sir Samson Lowa i bin mekim toktok bilong lukluk bek long wok bilong dispela sios na tu long wok bilong go fowod long misin bilong God na sios namel long ol pipel long PNG.

## Helpim hariap ol lain bikpela san i bagarapim

EM i taim nau long askim long helpim ovasis long ol lain husat i bungim bikpela hevi na bagarap long bikpela san o drai sisen.

Toktok i kam long wanpela sios woka husat i wari olsem dispela taim bilong san o drai sisen i mekim planti manmeri na pikinini i kisim bikpela bagarap, hangre na sampela i dai.

Dispela sios woka i tok em i taim nau long yumi long askim helpim long ol ovasis kantri. Na Australia Difens Fos (ADF) em i wanpela ogenaisesen husat i ken kisim ol rilif saplai i go long ol komyuniti husat i kisim bikpela bagarap long san.

Em i tok ol piksa i soim poto bilong ADF i givim kaikai o saplai i go long ol rurel manmeri bihain long PNG i bin kisim taim long 1997 draut o drai sisen.

Em i tok dispela draut yumi bungim long las yia inap nau i



Reveren Sir, Samson Lowa, pastaim Modereta bilong Yunaitet Sios bilong PNG. Foto: Frieda Sila Kana

Em i givim salens long ol sios minista na ol pasto na ol lida bilong sios long senisim sampela pasin bilong lotu na pasin bilong autim gutnius bilong God. Em i salensim ol lida bilong sios long autim tok we bai senisim laip bilong man na i no bilong lotu nating tasol olgeta Sande.

"Spirit bilong God i stap antap long yumi, tasol yumi mas senis long yumi ken kamapim senis. Taim yumi autim tok, yumi laikim laip bilong man na meri i mas senis, i no bilong autim tok nating." em i tok.

Sir Samson i tok olsem sios i no save mekim wok ministri bilong en long mak stret. Em i tok olsem bihainim Aposel Peter long Nu Testamen sios, taim em i pulap long Holi Spirit, triepla wik tasol bihain long Jisas i bin dai na kirap bek gen, em i go ausait tasol na autim tok bilong dai bi-

long Jisas. Em i no pret long tokim ol Juda lain olsem ol i kilim Jisas. Ol i kirap nogut long dispela tok tasol em i tok moa long ol olsem 'sin bilong yupela tasol i mkeim na Jisas i dai long diwai kruse. Em i karim sin bilong yupela long bodi bilong em yet," em i tok.

Insait long dispela bung sampela bilong ol pipel i luk-save olsem sin bilong ol i putim Jisas Kraus long diwai kruse. Olsem na ol i laik senisim laip olsem Peter i toktok.

"Ating sampela pipel bai tokim yumi nau olsem, mipela i no moa lukim paia na win olsem long taim bilong ol aposel!"

"Tasol mi ken tokim yupela olsem, insait long 7-pela sot-pela taim mi wok olsem Modereta bilong Sios mi lukim Spirit bilong God i putim han i kam antap long

dispela sios long wanpela spesel wei. Wanpela profesia em i lusim wok mani bilong en wantaim meri bilong en na i kam long helpim mipela long kamap tisa long Tiolojikel Koles. Sios i no baim em. Na meri bilong em tu i stap wantaim mipela olsem volantia tasol. Mi lukim olsem em i wok bilong Holi Spirit. Mi no lukim strongpela win na paia tasol mi lukim wanpela man i senisim laip na pasin. Nau narapela Dokta i lusim Goroka univesiti na i kam tisa long Rarongo Tiolojikel Koles.

Em i Holi Spirit soim pawla bilong em long larim Dokta Unagi i kam long tisim tok bilong God. Taim ol pipel i kisim moa mani na i kamaut long givim sevis long God na givim mani bilong ol long God, yu ting wanem long dispela?

Rev Samson i tok ol pasto na ol minista bilong sios i no ken kamap olsem ol rabis man long strit na go askim ol mani man long liklik mani na kaikai. No gat, mani em i stap long haus lotu we ol manmeri i kam long harim gutnius.

"Ol wokman bilong God i mas no ken go askim ol man nabaut. Yu no rabis man. Yu gat planti samting bikos insait long God yu i gat planti samting.

Larim Holi Spirit yet bai wok long laip bilong ol mani man long givim mani insait long sios. Autim tok bilong God na mani bai kam," Sir Rev. Samson i tok.

## CBC toktok longol turis bungim birua long Kokoda

KONPRENS bilong ol Katolik Bisop bilong PNG na Solomon Ailan (CBC) itok dispela pasin noguti bin kamap long tupela turis long Kokoda Trek I bringim sem na nem nogut long PNG. Tupela turis bilong Ingran na Amerika i bin kisim bagarap long han bilong ol trabelman long Januəri 11.

Dispela pasin noguti bagarapim turis bisnis bilong dispela kantri, na soim piksa nogut long ovasis.

Jenerel Seketeri bilong CBC, Pater Victor Roche SVD, i tok meri na man i bin kam olsem ol turis long lukim kantri bilong yumi na ol gutpela samting kantri i gat long en.

Em i tok long kalsa bilong yumi, yumi mas lukautim gut ol narapela man na meri, tasol nogat, sampela lain i bagarapim ol tupela visita.

Pater Victor i tok dispela trabeli bikpela tru bikos Kokoda bai lusim ol turis na ol pipel long eria bai lusim mani ol i save kisim taim ol turis i go lukluk raun long hap bilong ol.

Em i tok dispela kain pasin i kamapim nem na piksa nogut bilong PNG long Amerika na Ingran we tupela turis i kam long en.

Em i tok CBC i sapatim singaut bilong Minista bilong Turisim, Justin Tkatchenko, husat i tok ol kriminel i mas kam aninit long lo.

Pater Victor i tok i moabeta long ol wanpisin na hauslain bilong ol kriminel i wokim samting na baim K100,000 i go long tupela turis na turis bisnis long PNG.

## Yut, Meri na Famili

Pastor Barbara Lunge

## God i lukautim yumi

God i save lukautim olgeta pikinini bilong em na banisim ol long no ken kisim bagarap na birua. Tasol em i save larim sampela samting tu i kamap olsem bilong stikim na lainim yumi bilong gutpela sindaun bilong yumi long bihain taim.

Insait long disela toktok mi laik toktok long pasin bilong God i save lukautim na banisim yumi olgeta taim.

God i save lukautim yumi olsem wanpela ai kiau bilong yumi. Wanpela ai kiau em i gat karamap olsem lens o liklik glas wantaim sampela mit bilong bodi na bihain karamap bilong ai yet. Skin o karamap bilong ai i save op na pas long rausim ol lang na ol narapela pipia long no ken go insait long ai.

Dispela piksa i makim wanpela samting em i dia tumas long yumi. Buk bilong propet Sekaraia i tokaut olsem yumi ol bilip man na meri i olsem ai kiau bilong God. "Olsem na Bikpela I Gat Olgeta Strong, em God i save stap long bikpela lait bilong strong bilong em yet, em i tingting long kantri i bin bagarapim ol manmeri bilong en, nae m i tokim ol Jerusalem oslem, 'Sapos wanpela man i laik bagarapim yupela em bai i bagarapim em yet.'" (Sekaraia 2:8)

Yumi olsem katim wara Jordan pinis na yumi mas mekim Jisas kamap Bikpela na King bilong yumi long yumi ken stap insait long lukautim bilong God.

BIKPELA bai painim yu insait long wanpela ples nating na we i no gat helpim i stap. Sapos yu stap long hap we i no gat helpim, gtuepla wei em long singaut long nem bilong Bikpela Jisas Kraus husat em i man bilong kisim bek ol manmeri bilong graun.

"Ol Israel i longlong na raun nabau long les wesana nogut, em ples i gat bikpela win. Na Bikpela i painim ol na kisim ol na helpim ol.

Em i was long ol, olsem em i save was long em yet. God i helpim ol Israel gut na ol i no bagarap, olsem tarangau i lainim pikinini bilong en long flai, na taim pikinini i laik pundaun tarangau i save go aninit na karim em long wing na pikinini i no bagarap.

God wanpela tasol soim rot long ol manmeri bilong en. Na i no gat wanpela god bilong ol arapela ples i helpim ol." (LO 32:10-12)

Yu mas singaut long nem bilong BIKPELA God long taim yu bungim hevi nae m bai sevim yu.

"Lukautim mi olsem yu save lukautim ai bilong yu yet. Haitim mi gut olsem kakaruk mama i save karamapim ol pikinini long wing bilong en. Olsem bai ol man nogut i no inap bagarapim mi. Ol i birua nogut tru long mi, na ol i wok long banisim mi." (Buk Song 17:8-9).

Yumi mas mekim stadi long Tok bilong God na putim long tingting na long bel bilong yumi long em bai banisim yumi long birua.

"Sapos yumi go long haus we ol man i krau long man i dai pinis, em i gutpela pasin na i winim pasin bilong go long huas we ol i mekim bikpela kaikai. Long wanem, yumi olgeta i mas i dai. Olsem na long taim yumi stap long graun, yumi mas tingting gut". (Saveman 7:2).

Yumi ol Kristen i mas stadi long Tok bilong na save gut long en olsem bai yumi inap long tokaut long dispela tok long taim yumi bungim hevi. Taim pasin bilong yu i winim bel bilong God em bai yu kamap olsem ai kiau bilong God.

God i ken blesim yu.



KOMENTRI

# Watpo bai ol pipel bilong yumi i dai long hangre

REN i pundaun long planti ples insait long kantri na ol pipel i stat long planim ol kaikai na i gat wara bilong waswas na dring. Tasol long sampela provins, ol pipel i pilim yet ol bagarap dispela longpela taim bilong san i bin kamapim.

Las wik yumi lukim ol piksa na harim stori bilong ol pipel long hap Nomad distrik long Westen provins husat i sot tru long kaikai na ol i stap wantaim hangre. Sampela manmeri na pikinini i dai pinis bikos i no gat inap kaikai. Ol i stap wantaim hangre na bodi bilong ol i no gat strong long abrusim ol sik.

Long hap bilong Sandaun provins, na Morobe i gat ripot bilong ol binatang i bagarapim ol taro na arapea kaikai long gaden. Ol pipel i tok ol gaden kaikai i bagarap na ol tu bai sot long kaikai bikos ol dispela samting i kamapim hevi long gaden bilong ol.

Bikpela askim i mas go long ol memba bilong palamen bilong ol dispela eria we ol pipel i wok long bungim dispela hevi. I gat gutpela wok bung i kamap namel long ol memba bilong palamen, ol lokal level gavman na ol disasta menesmen opisa o nogat? Watpo na yumi lukim ol pipel i dai long hangre sapos gavman i givimaut mani bilong baim kaikai na skelim i go long ol pipel long mun Oktoba? I bin gat ol patrol i go aut long ol dispela longwe ples long lukim tru sapos ol pipel i nidim moa helpim o nogat?



Rilif kaikai bilong mi we? 6-pela mun nau mi wet yet..

Sori tru! Ol raskol i stilim rilif kago ..

Ol wokmanmeri long gavman i stilim ol mani bilong helpim ol draut ples..

Jada M61

Westen provins em i wanpela provins we i gat ol kain kain politik namel long ol lida i wok long go yet. Dispela pasin i mekim na ol lida i no wok bung wantaim long helpim ol pipel bilong ol. Sandaun tu i gat wankain stori, ol politikal lida i no wok bung, ol i

bringim sevis i go long strong bilong ol wan wan na i no wok bung wantaim gavana. Na husat i gavana bilong dispela provins?

Dispela kain pasin bilong ol lida i stap wan wan na mekim wok bilong lukautim ilektoret bilong ol tasol i kamapim hevi we ol pipel i

kisim taim.

Na ol distrik edministreta i save mekim wanem kain wok? Ol inap long hariap na tok save long disasta opis sapos ol i lukim kain hevi olsem i kamap long ol pipel o nogat?

Ating sapos ol i raun insait long distrik bai ol inap long luksave hariap na helpim ol pipel.

Yumi askim ol dispela kwesten bikos nesenel gavman i givim planti milen Kina tru long baset i go long wan wan distrik. Ol LLG tu i kisim bikpela mani long bringim sevis i go long ol pipel. Na watpo bai kain bagarap olsem i kamap bikos yumi no inap long givim kaikai long ol pipel husat i sot tru?

PNG em i ples we yumi no sot long kaikai. Oltaim yumi save paitim bros na amamas long gutpela graun, wara, ol kain kain kaikai na abus long bus bilong yumi.

Tasol las yia yumi lukim tru olsem taim i senis nau na ren i no pundaun long taim bilong em. San i strong tumas na i bagarapim

graun na ol gaden kaikai na wara i drai na givim bikpela hevi tru long ol pipel. Kaikai saplai i kam long gavman em i bilong sotpela taim tasol. Yumi mas tingting nau long bihain taim sapos wankain hevi olsem i kamap.

Nau em i taim bilong plen long wanem samting bai kamap long bihain taim. Sapos wan wan distrik i gat gutpela plen na program bilong lukautim laip bilong ol pipel, bai ol inap long givim trupela sevis i go long ol pipel.

Ol i ken salim ripot hariap long taim ol kain hevi olsem i kamap na sevim laip bilong ol pipel.

Tude i gat ol mobail fon na ol kompiuta inap long helpim ol pipel bilong yumi. I gat ol wei bilong groim ol kaikai na putim kaikai i stap longpela taim we i no inap bagarap.

I gutpela long yusim ol dispela nupela rot long helpim ol pipel bilong yumi. Yumi mas gat rot long tok save sapos ol kain hevi olsem i kamap long ol ples i stap longwe tru long ol taun.

Yumi go insait nau long 2016 na yumi no ken ting tasol long ol taun na siti na lusim ting ol pipel husat i stap longwe long bikbus na ples tais husat i save sot oltaim long ol samting.

Ol tu i gat wankain rait olsem yumi ol lain i stap long taun. Watpo bai ol i dai long hangre na yumi tromoi planti milien kina long ol rot na bikpela haus long ol taun na siti?

Yumi skelim gut na spendim stret mani long mak na maski wansait oltaim.

## Pasin bilong rispek na lukautim samting i pinis

WANTOK stap pastaim, harim! Ol manmeri i mekim gutpela toktok o nogat? Ol manmeri i spak o stap isi? Ol pikinini i harim toktok bilong papamama na ol bikpela lain o nogat?

Yes wantok, taim yu stap isi bai yu ken skelim wankain sindaun Papua Niugini komyuniti i wok long stap long em.

Long ol tok Inglis ol i tok "attitude" em bikpela hevi kantri bilong yumi tude.

Mi no inap givim taim o rispek long narapela na ol samting bilong em.

Wan wan manmeri na pikinini i bihainim laik bilong em tasol. Ol i no tingting sapos narapela man o meri i stap, o i soim rispek long narapela man na ol samting bilong em.

Dispela i kamapim bikpela hevi long ol pasin insait long kantri bilong yumi.

Tok i stap olsem bipo long mi givim yu samting, mi mas i gat dispela samting. Sapos mi no gat dispela samting,



em mi no gat tu long givim long yu.

Long dispela as em i wankain, bipo long mi rispektim yu, mi mas gat rispektim long mi yet pastaim.

Sapos mi save rispekim laip bilong mi, lukautim gut ol samting mi gat long em, mi inap long rispektim narapela man na ol samting bilong em.

Dispela kain pasin i no moa stap nau. Liklik lain tasol i gat dispela pasin.

Tingting bilong planti manmeri nau em olsem samting mi gat em i bilong mi tasol na bai pinis long mi

tasol, i no bilong famili, komyuniti o kantri bilong mi tu. Nogat.

Sampela samting i kamap i kamap wantaim long ol ples na ol taun tasol sampela ol samting i kamap tasol long ples na sampela long taun tasol.

Maski long ol bikpela paul na stil pasin i kamap long ol bikpela opis o long liklik opis.

Wokabout long rot na bai yu lukim manmeri na pikinini wantaim i tok nogut long ples klia, pait, kros, spak na mekim ol arapela kain pasin nogut.

Dispela kain sindaun i no gutpela long yumi yet na long kantri bilong yumi.

Mipela i mas luksave long dispela ol senis nogut i wok log kamap, painim rot na stretim ol hariap.

Sapos nogat, bihain taim bilong kantri bai bagarap.

Na i no gat narapela man o meri bai kam na stretim o senisim kain sindaun bilong komyuniti inap long yumi yet i senis.

Wanpela man husat inap long senisim yumi em God husat i mekim yumi na olgeta samting.

Inap long taim yumi i senisim lewa na tingting bilong yumi na larim God i go pas long laip bilong yumi, bai yumi i no inap senis.

Yumi i mas larim God i go pas long laip bilong yumi.

Em i mekim yumi na em i gat strong long senisim yumi taim yumi givim yumi yet long em.

Long yumi senis yumi mas ritim Metyu 22: 37-40 na Buk bilong Lo 6:4 long Ol Testamen we em i tok namba wan lo we i tok manmeri i mas laikim God wantaim olgeta lewa, tingting, strong na sol bilong em. Na namba tu lo i bihainim tasol namba wan lo we i tok long manmeri i mas laikim narapela manmeri olsem em i laikim em yet.

Taim yumi i mekim olsem na wantaim grasia bilong God, bai yumi lukim gutpela senis long laip bilong yumi na komyuniti bilong yumi.



Published Weekly, Thursday, for Word Publishing Company, Ltd.

P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: [editorial@wantok.com.pg](mailto:editorial@wantok.com.pg)

Websait: [www.wantokniuspepa.com](http://www.wantokniuspepa.com)

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

## 38 pipel dai long aisren long Amerika

IS kos bilong Amerika i kisim traipela bagarap long bikpela aisren i pundaun we i pasim trenspot sistem, ol bisnis, ol skul, ol gavman opis na 38 pipel i dai.

Ol ripot long 12-pela stet na Kolombia Distrik i soim olsem 38 pipel i dai taim bikpela aisren i bin stat long las wiken.

Long Masasusets, bikpela hap ais i pundaun antap long wanpela man i wokabaut na em i dai taim long Georgia, wanpela man i save wok long pos opis i bin dai taim strongpela win i bin brukim na pundaunim hap diwai antap long kar bilong em.

Long New Jersey, wanpela mama na pikinini i bin dai long posin ges bihain long ais i blokim paip long bak-

sait bilong kar. Planti dai i bin kamap long ol kar eksiden

### Nupela mak long aisren

Aisren nau long Amerika i wokim historii na klostu brukim rekot long Nu Yok siti we 26.8 ins sno o ais i pundaun long siti we i sot liklik tasol long rekot siti i gat long en long mak bilong aisren i pundaun insait long wanpela de.

Baltimore i kamapim nupela rekot wantaim 29.2 ins sno o aisren taim long Staten Ailan i rekotim 31.3 ins na 22.4 ins long Philadelphia. Tasol bikpela mak stret i bin pundaun long dispela wik em long

Glengary, West Virginia, we 42 ins sno si pundaun.



### Wok long klinim ples

Ol man i wok de na nait long klinim ais ren na sno long ol rot, ol ples balus na ol relwe trek long Georgia i go long Massachusetts.

Metro o Trein, bas na kar sistem long Washington i op tasol i no olgeta sevis i wok yet. Imejensi tambu ol i bin putim long ol non imejensi kar em ol i rausim long las Sande tasol Bosman bilong Nu Yok Siti, Bill de Blasio i tok hip sno bai stap long sampela taim.

Planti tausen ran bilong balus long Nu Yok em ol i kenselim long tripela ples balus long Nu Yok. Em long JFK, LaGuardia na Newark. Mak long olgeta ran bilong balus ol i kenselim em long 13,046.

## No inap lusim ol drag em bikpela salens: Trump i tok



RIPABLIKEN kendidet long resis bilong presiden long Amerika, Donald Trump i gat strongpela plen long stopim drag tred long Mexico i go long Amerika.

Dispela i bin kamap ples klia long Mande nait taim em i toktok long moa long 1,000 pipel long Farmington Hai Skul long New Hampshire, Amerika.

Em i bin tok plen bilong en em long bildim wol long boda bilong Mexico na Amerika long stopim iligel drag tred we i kisim ol dispela spakbrus i go long Amerika.

Em i tok namba wan askim taim em i go long New Hampshire em ol drag i wok long go insait na ol i bihainim rot long Sauten boda wantaim Mexico.

Trumop i tok ol bai stopim na em i tok strong long tritmen na „prevention” o stopim long go insait long stet long Mexico.

## Pasim sampela sevis bai go het

Ol Federel opis i stap pas wantaim ol skul long Washington DC, Virginia i go olsem long Jersey. Wanpela nes i wokabaut klostu tu mail long bikpela sno i go long wok.

Toktok long wok komitmen, bikpela sno na aisren long dispela wik i no bin stopim Chantelle Diabate i gat 31 krismas i go long wok.

Chantelle i no pret tasol em i tingim ol siklain na wokabaut klostu tu mail i go long wokples bilong em long Hebrew Home, em wanpela nening hom long Bronx.


Chantelle i tok bikos long bikpela hevi long sno na aisren i pundaun, em i save olsem no gat man tumas bai go long wok na olsem, em i tingim ol siklain i laikim

helpim na em i go long wok.

Em i bin wokim ol dabel sif wok wantaim ol narapela woklain i bin kamap long wok.

David Pomeranz, em Dairekta bilong nening hom i tok Chantelle i no laik wokim nem o kain samting olsem, tasol em i laik mekim wok tasoil bikos em i pilim olsem ol sikman bai laikim helpim.

**TOKSAVE!! TOKSAVE!! TOKSAVE!!**



**Wantok**  
Niuspepa

**Stat long Mande 01 Februeri long neks wik, Wantok Niuspepa opis bai i go long narapela hap long Boroko.**

**Opis nau bai lusim Able Computing haus long Sentral Waigani, tude Fonde 28 Januəri na i go long DOVE TRAVEL SEVIS HAUS LONG SEKSEN 24, LOT 25, ANGAU DRAIV (KONA BILONG LAHARA AVENUE), BOROKO.**

**Opis fon namba (325 2500) na fex namba (325 2579) bai stap wankain yet tasol ol email adres bilong olgeta wokman na meri bai senis.**

**Pastaim email adres i pinis wantaim dispela mak, @wantok.com.pg, tasol nau em bai pinis wantaim @wantokniuspepa.com.**

Ol mobail namba long ringim mipela long bisnis insait long taim bilong muv em:

- 73329467 – Elizabeth Konga – Jeneral Menesa
- 76210007 – Lesley Bentz – Edvetaising na Sels Menesa
- 72739408 – Veronica Hatutasi – Edita
- 73650795 - Edvetaising

Long bisnis toktok, sapos yu save long mobail namba bilong wanpela wokman o wokmeri orait ring long mobail tasol na toktok.

**Wantok Niuspepa i laik toksave tu olsem mipela salim olgeta opis tebol na des long K200 wanwan. Yu kam hariap bai yu baim wanpela long liklik prais tasol!**

*Toksave i kam long Jeneral Menesa, Elizabeth Konga.*

# UB40 pulim planti fen



Nicky Bernard i raitim

BIKNEM ben bilong Inglen (England) UB40 i pulim panti manmeri na pikinini long Pot Mosbi long go lukim singsing bilong ol long Sir John Guise Stadium.

UB40 ben em i wanpela long ol olupela ben insait long wol. Planti ol papamama bilong bipo long 1980s na 90s bai tingim dispela nem bilong dispela ben yet.

Ol singsing bilong ol i bin pairap long sat bilong olgeta kantri husat i save harim singsing bilong ol long redio na TV. Na dispela i mekim nem bilong ol go bikpela moa yet wantaim planti singsing bilong ol olsem Red Red Wine, Red in the Kitchen na planti moa.

UB40 ben i bin raun kam long PNG long 2014 wantaim tupela memba bilong ben tasol, Ali Cambel na Astro na tupela bin pilai wanpela nait tasol long Gold Club long Lamana Hotel.

Dispela nait, planti ol fen bilong ol i no wari long prais bilong ticket, ol pulapim olgeta liklik spes long Lamana Gold Club.

Dispela i mekim tingting

bilong ol menesa bilong Lamana Hotel long kisim ol kam raun gen long Mosbi na PNG long mekim wanpela bikpela so we olgeta fen bilong ol bai ken lukim ol pilai.

Long dispela yia 2016, Lamana Hotel i kisim ol kam bek na mekim tupela so. Wanpela long Gold Club yet long Lamana Hotel na bikpela so bilong olgeta pablik manmeri na pikinini long Sir John Guise Stadium.

Ol tripela olupela ben memba bilong UB40 i tok, PNG bai kamap olsem stop ova kantri bilong ol taim ol bai go pilai long ol narapela kantri. Ol bai kam pilai na redim ol long so bilong ol long narapela kantri. Ol tok ol fen bilong ol long PNG bai gat sans long lukim ol pilai na harim ol nupela singsing bilong ol.

Lamana Hotel i save bring ol bik nem ben bilong ol narapela kantri we singsing bilong i popula long PNG long kam pilai long Gold Club tasol.

Dispela em namba wan taim Lamana Hotel i bringim wanpela bikpela ben kam na pilai long ol pablik manmeri na pikinini bai lukim ol pilai.

Mosbi i bin lusim dispela kain ol bikpela so tu long longpela taim na no gat wanpela bik nem ben o musik man bilong narapela kantri i bin kam pilai klostu long 15 yia nau.

Long 1995 o 1996 bik nem rege musik man Lucky Dube i bringim ful ben bilong em kam na pilai long Pot Mosbi Ragbi Lig graun na dispela pilai graun i bin pulap long ol fen bilong em.




Wanpela famili ben ol kolim long MAKOMA i bin kam pilai tu long Pot Mosbi taim ol singsing bilong ol bin paia lait long ol redio stesin bilong yumi long PNG. Ol fen bilong ol i bin brukim banis bilong olupela Sir John Guise stadium na go lukim ol i pilai.

Dispela ol bikpela so i bin stop longpela taim, ating em sponsa tasol i mas nogat na i hat long kisim ol kain ol bik nem ben na musik manmeri long kam pilai.

Lamana Hotel i stat long kisim ol bik nem ben na musik manmeri kam pilai long Gold Club na sapos olgeta samting orait bai ol mekim gen bilong ol pablik manmeri na pikinini bai gat sans long lukim.



# Em nau! Ol pikinini i ken painim rot i go long ples wantaim Wantok kru...



Ol wod lista hia:

- AISBLOK
- ALTA
- ANANIT
- BATEN
- BIHAIN
- DIWAI
- DOKTA
- DRAIBISKET
- FOPELA
- FOTNAIT
- GRAUN
- GRILEGLAS
- HAMBAK
- HAMAS
- INDEPENDENS
- INTAVIUA
- JISAS
- KAMAPIM
- LIMBUM
- MANGI
- NARAPELA
- ORAIT
- PAMKIN
- SKWAT
- TEPRIKODA

S E L G F R A A I J S T E T E Q L S O Q  
 I S T B G M A N G I N N A T I S D A F N  
 N Y Q A S V A I P S I W D Z H A H N L Y  
 D C V T F O P E L A K R R K P E H H I E  
 S I L E M R R S U S D O K T A A A H T E  
 P P W N A A H I I P O R S S R D M T T A  
 A A C A N H V T G C O O N D O I B G L B  
 N G U N I A O G O O S Q R K P H A M O V  
 R O P A T G E J A N S D I A F A K B P Q  
 E C L N A R A P E L A R M S I O I E I K  
 P I I I I I N D H E P A T G L T S S Y O  
 E J M T F L N H K E K I U B R F S A F E  
 E T B O A E L H T A A B S I M A S Y T M  
 Y B U S P G L R T N P I C H M I U V E L  
 L X M E S L R L T Z A S G A I D E N R D  
 L B D Y E A A O S B M K H I A C Q E S O  
 E N V M P S F D R N K E A N J O O D L A  
 I R K T T E O O R I T A Q O G V I H N  
 Q F F P K I O S N R N R R J N X L A N U  
 I T E T E I S R J D I D C W F E T O N O

## Stori bilong tumbuna

Mi brukim stori tumbuna long tu-pela hap bikos mipela i gat tripela ailan. Namba wan em Mussau, namba tu em Emirau ailan na namba tri em Tench ailan.

Long Mussau, pasin kastom bipo ol tumbuna pasin i bin stap. Manmeri i save dai ol i no ken go planim autsait, nogut ol man i kam rausim long nait na karim dai man meri i go.


Ol i save planim long haus insait bai i lukautim i stap na tu ol i no save putim long kofin boks, nogat! Ol i save karamapim tasol long laplap. Brukim hap laplap na pasim bodi bilong em, na putim i go daun. Ol manmeri ol i stap sori long tripela wik bipo ol i go long haus bilong ol.

Stori tumbuna bilong Tench ailan. Bipo ol tumbuna pasin long manmeri i dai em long taim ol i no dai olgeta na i laip yet, i toktok yet bai i tokim ol manmeri na famili go kam bek long mi. So ol i karamapim long laplap tasol i toktok yet na i tokim ol karim mi nau go kam bek long mi.

Ol pipel karim kanu, putim dai manmeri i go tasol long bik solwara, pul, pul i go yet na manmeri i askim ol manmeri, yumi klostu? Ol pipel i no gat, go yet bihain ol i lukim ol diwai long ples i go daun na i askim gen lumi kamap pinis? ol i tok yes, bai i tokim ol orait go bek nau putim mi go daun.

Ol pipel i karim na subim i go daun nau long bik solwara, i tok gut bai. Ol tromoi i go daun na ol i go bek long ples. Ol i save pasim bikpela ston long lek bilong en i save hevi kisim i go daun harip long bik solwara na ol pipel i kam bek long ples.

Ansa bilong Wod Pilai isu 2156





# TOK PISIN NEWS

from Radio Australia  
radioaustralia.net.au

Harim TOK PISIN long  
Radio Australia  
**101.9FM**  
Port Moresby

**Tok Pisin Service**  
6am - 7am 6080; 7240(KHZ)  
7pm - 9pm 5995; 6020; 9710; 1280(KHZ)

## PNG Gavman i mas putim skul long setelmen



Sampela skul pikinini long Mosbi i selebretim Yunivesel de bilong ol Pikinini. *Poto: ABC*

### Caroline Tiriman i raitim

Dispela i bilong helpim ol pikinini i go skul na no ken raun nating long ol strit. Jenerel Seketeri bilong Asosiesen bilong ol Tisa long PNG, Ugwalubu Mowana i askim strong Nesanel Gavman long putim ol skul long ol setelmen long helpim ol pikinini i save raun nating long strit long kisim edukesen. Mista Mowana i mekim dispela askim klostu taim ol sumatin long kantri bai go bek long skul long wik bihain. Toktok bilong en i bi-

hainim tu wari bilong sampela lida long komyuniti husat i tok planti pikinini i save raun long strit long ol bikpela taun olsem Pot Mosbi, Lae, Maun Hagen na Goroka, na i no save go skul. Planti long ol dispela pikinini i save raun na salim ol botol, ol slipa, nudels na ol kain kain samting bilong kisim liklik mani long lukautim ol yet. Mista Mowana i tokim Redio Australia olsem olgeta pikinini i gat rait long go long skul na gavman i mas lukim olsem dispela sevis i mas stap.

## PNG Deputi Oposisan lida i no wanbel long Egrikalsa Minista

### Caroline Tiriman i raitim

Praim Minista i mas givim mekimsave long Egrikalsa minista Deputy Lida bilong Oposisan long PNG i tok Praim Minista Peter O'Neill i mas givim strongpela mekim save long Minista bilong Egrikalsa na Laipstok, Tommy Tomscoll. Sam Basil i mekim dispela toktok bihainim planti wari na kros long komyuniti nau long paulim wok bilong baim ol kaikai i kam long Australia na New Zealand. Minista Tomscoll i bin

kamapim dispela loa long 2015, tasol samplea i tok dispela tambu i kamap long taim we bikpela san i hamarim kantri na kaikai i sot long olgeta hap. Mista Tomscoll i bin rausim tambu o ban long ol kain kaikai olsem onien na kepsikamm, na em i bin larim tasol tupela bisnis man long baim ol dispela samting i kam long ol narapela kantri. Nau Minista i tok gavman bai kamapim nupela loa bilong egrikalsa long helpim ol kopi, kakao, kopra, raba na ol laipstok fama.

## Sampela Australian edvaisa i stap yet long PNG



Wanpela Australia Federel Polis opisa i wok wantaim Polis Dipatmen. *Poto: ABC*

### Caroline Tiriman i raitim

Liklik lain tasol i lusim pinis PNG bihain long gavman i bin tokaut olsem ol foren edvaisa bai no nap moa wok long kantri. Paul Barker, em EksekutivDairekta bilong Institiute ov National Affairs long PNG i tok ol Gavman bilong Australia na Papua New Guinea nau i wok long lukluk gut gen ol wok bing ol edvaisa bilong Australian long PNG bihain long sampela i lusim pinis kantri na go bek long Australia. PNG Gavman i bin tokaut long mun Novemba 2015 olsem ol foren edvaisa bai lusim wok na sapos ol i

laikim bai ol inap wok olsem ol pablik sevan long ol gavman dipatmen. Dispela program i bin stat long Januəri 1 long dispela yia, tasol sampela edvaisa i stap wok yet long PNG we Gavman bilong Australia na PNG i wok long traim painim gutpela we long wokbung long dispela samting. PNG i tok dispela loa i no karamapim ol wokbung wantaim Australia long Polis na Difens Fos, Koreksenel Sevis, Judiiseri na Majis-teriel sevis. Paul Barker, ekseyutiv Dairekta bilong Institute ov National Afeas long PNG i tok sampela ddvaisa bilong Australia i stap yet long PNG.

## Vanuatu Ilekse Risal

### Sam Seke i raitim

Ol risal i no opisel yet long snap jenerel ileksen long Vanuatu long Fraide i soim olsem i gat 37 nupela memba insait long 52- memba nesanel palamen bilong Vanuatu. Suprim Kot i bin konviktim 15 long ol foma MP long korapsen na 14- pela long ol i nau stap insait long kalabus na ol i no bin resis long dispela snap ileksen. Niusman long Port Vila, Hilaire Bule i tok namel long ol biknem kandidat husat i

bin lus nau em i praim min-ista bipo, Ham Lini. Hilaire i tok dispela i lukim olsem em i namba wan taim stat long independens long 1980 we i no gat dispela nem LINI insait long Palamen bilong Vanuatu. Long wankain taim, em i tok ol bung i stat pinis long lukim husat nau bai fomim nupela Vanuatu gavman. Hilaire i tok wanpela long ol lain we i lukluk long ranim nupela gavman nau em oposisen lain bipo we Donald Kalpokas bilong Vanua'aku Pati nau i go pas long en.

## Wanpela Vanuatu grup i laik kamapim koalisen gavman

### Sam Seke i raitim

OL opisel risal bilong liklik jenerel ileksen long Vanuatu long las Fraide i no kam aut yet, tasol wanpela grup i tok em i gat namba pinis long ranim nupela gavman, Ekting Presiden bilong Vanua'aku Pati, Joe Natuman i tok. Grup ya nau em i bin stap insait long oposisen bipo na em i karamapim Vanua'aku Pati, Union of Moderate Parties, Graon Mo Jastis Pati na sampela moa. Mista Natuman i tok grup bilong ol wantaim sampela independen memba bai moa long 27 memba we ol i nidim long fomin nupela gavman. Mista Natuman i tok ol lain bilong kea teka gavman bilong Sato Kilman i no gat sans long fomim gavman long wanem, em wan Mista Kilman tasol i bin win long ileksen. Em i tok snap ileksen ya i bin afektim wok redi bilong olgeta politikel pati we i bin ting olsem nomol taim bilong ileksen bai kamap long pinis bilong dispela yia. Long ol narapela samting i kamap, Siaman bilong Transparency International Vanuatu i tok ol nupela memba bilong Vanuatu Palamen i mas wokim wok bilong ol bihainim loa na

long transperen o klia pasin. Dokta Willie Tokon i tok i gat klia piksa pinis long ol 14 foma memba i stap nau ya long kalabus sapos ol i bihainim ol korap pasin. Dokta Tokon i tok ol memba i go long palamen long sevim kantri na komyuniti bilong ol na i no ol wan yet o sampela tasol. Em i tok tu olsem i gat ol tokwin long sampela braiberi i bin kamap long taim bilong ileksen. Dokta Tokon i tok pipel i mas givim pruf long ol kain tokwin olsem na ol i ken kotim ol husat i stap insait long korap pasin olsem. Tasol em i tok proses bilong ileksen i bin g ohet gut. Long wankain taim, lida bilong ol Melanesian Spearhead Group Obseva long ileksan i tok ol i amamas long wanem, ol i bin lukim long taim bilong vot long las Friaide. Praim Minista bilong Solomon Ailan bipo, Sir Francis Billy Hilly i tok i luk olsem ol pipel i bin amamas long stap insait long ileksen. Sir Francis i tok em i save tu olsem planti sapota na kendidet we i no win long ilekse bai no amamas. Tasol em i tok wanem kain risal bilong ileksen em i kam aut, em bai soim laik bilong ol pipel bilong Vanuatu.

## Solomon Ailansios 2016 plen

### Caroline Tiriman i raitim

Wanpela lida bilong ol Kris-tenkomyuniti i long Solomon Ailan i tok olgeta pipel i mas wok bung long kamapim trupela pis o belgut na bel isi pasin long kantri. KatolikAsbisop bilong Honiara, Adrian Smith, i mekim dispela toktok bihainim miting bilong Solomon Ailan Kris-ten Asosiesen long last wik. Em i tok displa tingting bilong ol i stap insait long ol

plen bilong ol long displea yia 2016. Asbisop Smith i tok tu olsem ol pipel i mas sanap strong na stap gut wantaim nau long wanem lain bilong Solomon Ailan Rijonel Asis-tens Misin long Solomon Ailan lostu nau bai lusim kantri olgeta. Ol i bin statim RAMSI long traim daunim ol trabel namel long ol pipel ilong Guadalcanal na Malaita provins.

# ExxonMobil salim 160 LNG kago pinis



Bikpela tenk bilong holim LNG long PNG LNG Plent eria ausait long Pot Mosbi.

## EXXONMOBIL, opreta bilong PNG LNG Projek, i salim 160 LNG kago i go long Asian maket long Taiwan, Saina na Japan.

Dispela 160 LNG kago i karim 11.7 milien tan bilong ges ol i kisim long Hides long Hela Provins.

Wanpela mausman bilong ExxonMobil i tok dispela bikpela oil na ges kampani bilong Amerika i gat ol plen long skruim PNG LNG Projek wantaim namba tri tren.

"Mipela i wok long putim moa mani long painim nupela ges risos long larim PNG LNG Projek i kamap bikpela moa," em i tok.

Wanpela bilong dispela ol plen em long mekim eksplorasen na drilim Muruk wel klostu long Juha

na long P'nyang fil long Westen Provins.

Em i tok dispela tupela risev ges fil long Muruk na P'nyang bai givim bikpela sans long apim level bilong ges saplai long kirapim pawa saplai long PNG na long kisim moa ges long skruim PNG LNG Projek i go moa wantaim namba tri tren.

"Mipela i wokbung wantaim gavman long kisim Petroleum Developmen Laisens (PDL) na Paipain Laisens (PL) bilong P'nyang ges fil, we ges i kam long dispela fil bai kamapim wanpela 50 megawat pawa stesin klostu long t LNG Plent sait," em i tok.

P'nyang ges projek bai kirapim planti wok mani na helpim gav-

man i kisim takis mani na ekwiti winmani long ranim kantri bikos em bai kamap narapela bikpela multi-bilien-dola invesmen long PNG we dispela i ken mekim sais bilong PNG LNG Projek i kamap bikpela tru.

"Dvelopmen bilong Juha bai kamap long bihain taim. Aninit long PDL 9, mipela i wok long wokbung wantaim gavman long kamapim taim bilong bilong kirapim Juha ges fil.

"Ol papagraun bai kisim royalti mani taim gavman i pinisim ol wok panimaut long sekim na glasim gut ol papagraun tru bilong projek eria," dispela mausman bilong ExxonMobil i tok.

# Agiru: Kroton Ekwiti bilong mipela

NESENEL oil na ges kampani bilong PNG, Kumul Petroleum Holdings Limited, i no gat rait long tok tok long 4.27 pesen ekwiti bilong PNG LNG Projek eria papagraun na ol provinsal gavman.

Hela Gavana Anderson Agiru i tok ol papagraun bilong wan wan projek eria bilong PNG LNG Projek wantaim ol 5-pela provinsal gavman bilong Hela, Sauten Hailans, Westen, Galp na Sentral tasol i gat rait long toktok long dispela 4.27 pesen Kroton Ekwiti.

"No gat wanpela man i bin kisim PNG LNG Projek i kam long kantri. Mi bin kisim LNG Projek i kam insait long PNG. Dispela bikpela K43 bilien ges projek em i han mak bilong mi.

"Ol man i ken tok ol i save long ges projek o

LNG projek tasol long PNG, mi kamap namba wan man long kisim LNG Projek i kam insait long PNG.

"Mi bin stretim ol toktok wantaim gavman na projek divelopa long kirapim dispela projek. Mi bin sainim agrimen long kirapim LNG projek na agrimen i no givim wanpela tok orait long Kumul Petroleum o Kroton Namba 2 long toktok long dispela 4.27 pesen ekwiti bilong ol papagraun," Gavana Agiru i tok.

Em i tok pawa bilong ges em i stap wantaim em na Kumul Petroleum o gavman i no ken yusim ol papagraun long mekim sampela kain samting we em i no stret long ai bilong ol papagraun.

"Kumul Petroleum i no kenyusim dispela 4.27 pesen long mekim sam-



Hela Gavana Anderson Agiru

pela samting we gavman i laikim. Dispela 4.27 pesen em i samting bilong ol papagraun na mi

laikim gavman i no ken toktok o tatsim dispela 4.27 pesen Kroton Ekwiti," Mista Agiru i tok.



## INVESTMEN TOKTOK wantaim Dokta Stephen Nash

### Ol aset bilong PNG

Sapos yu gat sampela askim, plis salim i kam long [toktoksuper@nambawansuper.com.pg](mailto:toktoksuper@nambawansuper.com.pg) na mipela bai helpim yu.

Long las mun NSL i lukluk bek long sampela samting we bai kamap long baset, na wanem kain tingting i stap baksait long ol baset.

Long dispela mun mipela i lukluk long wok bilong ol aset insait long PNG. Na nogut yu bai slip long dispela kain toktok tasol wok bilong aset em i gat tupela klas, wanpela em i domestik ikwiti na narapela em i domestik bon, na tupela i save wok poroman olgeta taim.


Sapos ol bon na ol ikwiti i givim baksait long ol yet na i go long narapela rot, orait yumi bai tok olsem ol aset klas i no wok bung gut. Dispela em i gutpela tru long potfolio, bikos em i minim olsem taim wanpela aset klais i go daun, olsem ol domestik ikwiti, ol arapela aset klas olsem ol bon bai lukim prais bilong ol i go antap. Long narapela wei bai yumi tok olsem, ol mani i kam long ol bon bai helpim long karamapim mani we i lus long ol ikwiti.

Insait long ol piksa mani maket, olsem long Yunaitet Stets (US) dispela kain wok bilong tupela rot bilong mani em i klia olsem Piksa, 1 i soim, na tu yu lukim wei bilong ol winmani long wanpela yia i go long narapela rot insait long yia 2008 i go lon 2009

### Piksa 1


Tasol kain samting bai kamap sapos bon maket em i stap long kes mani, bikos wei bilong em i olsem, tasol sampela:

- **step wan:** ikwiti maket i lusim strong bilong em taim gro bilong mani mak na tingting bilong inflesen i go daun,
- **step tu:** taim lukluk bilong gro na inflesen i lusim strong, sentral benk bai daunim ol intres reit bilong en na
- **step tri:** taim reit bilong mani i lusim strong em i isi long putim mani long ol bon, na ol lain bilong baim bon bai baim ol bon na mekim prais bilong ol bon i go antap.



Wok bung long wanwan taim i no bikpela samting, tasol bikpela samting em olsem ol lain i go insait long maket long baim ol bon. Orait long PNG, dispela kain samting i no save kamap bikos maket i stap yet long ol samting we i no kes mani, olsem na em i min olsem rot bilong mani we yumi tok long em antap i kamap log US, tasol em i no save kamap long PNG.

Nau olsem maket i no stap long kes mani, em i stopim wok bilong ol lain i stap insait long maket, na wok bung namel long ol ikwiti na ol bon, insait long PNG, i no nogut; em i gutpela liklik, olsem Piksa 2 daunbilo i soim. Lukluk gut moa long yia 2008 i go long 2009, we ol ikwiti na bon mani i bihainim wankain rot tasol; na ol maket i wok wantaim long gutpela wei.



### Piksa 2

Ating yu bai tok, "Na olsem wanem?"...

Orait, em olsem kain samting em i no gutpela long ol investa, bikos em i minim olsem taim i nogat kes mani em i em i pasim rot bilong maket, na kamapim no gut wok bung we i stap aninit long olgeta nupela we bilong toktok long ol potfolio.

Tasol sapos ol bon maket likwiditi inap kamap, orait, lukluk bilong ol potfolio bai gutpela. Planti senis long maket bilong ol bon na ol kain kain mani, nau i mas hariap long senis i go long kes mani long ol i ken kamap insait long PNG bon maket. Ol kain senis bai kamap, bikos em i wei bilong bisnis na yumi no inap long abrusim, tasol kos bilong en long kamap long sotpela taim olsem, bai bikpela tru.



Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

**BIKPELA, GUTPELA, SEIF, STRONGPELA NA I STAP NAMBA WAN YET.**

# Ramu NiCo yunien i no bihainim lo

**DIPATMEN bilong Leba na Industriel Rilesins (DLIR) i givim strongpela toktok i go long ol memba bilong Ramu NiCo Alaid Wokas Yunien long ol i mas go bek long wok bikos dispela sindaun protes bilong ol long las wik Fraide i no bihainim stret lo.**

Senia Inspekta, Ogenais-esin wantaim DLIR, Paul Wartovo i salim pinis wanpela opisel pas bilong tok save long olgeta yunien memba olsem ol i mas stat wok kwiktai bikos ol rot long stretim ol hevi na askim bilong ol lain yunien i no pas olgeta. I gat ol rot i stap yet long stretim hevi na sindaun protes em i no stret.

“Moabeta olgeta memba bilong Yunien i mas go bek na stat wok kwiktai na larim ol eksekutiv bilong Yu-

nien na menesmen bilong Ramu NiCo Menesmen i stretim toktok i go kam wantaim DLIR long dispela petisen,” Mista Wartovo i tok.

Mista Wartovo i bin raitim pas i go long presiden bilong Ramu NiCo Alaid Wokas Yunien long las wik Fraide, 22 Januəri .

Stat long las wiken inap long aste (Trinde) ol memba bilong Ramu NiCo Alaid Wokas Yunien long Kurumbukari Main na Basamuk Rifaineri i no go long wok.

Ramu NiCo Alaid Wokas Yunien i makim moa long 600 lokal wokman na ol i wokim sindaun stop wok long soim belhevi bilong ol long sampela samting we divelopa Ramu NiCo (MCC) i mekim we ol i ting i no stret.

Long las wik Fraide, Januəri 22, Presiden bilong

Ramu NiCo Menesmen (MCC), Wang Jicheng tu i bin salim tok pinis long ol wokas yunien memba long go bek long wok kwiktai.

Sindaun na stopim wok i kamap bihain long ol yunien memba i no amamas long bekim bilong Kampani long 11-pela poin we i stap long wanpela pestisen o askim ol i givim long kampani long Januəri 7.

Long bekim bilong en, Kampani Presiden, Wang Jicheng i tok olsem em bai lukluk moa long stretim ol dispela askim i stap long petisen na i tok tenkyu long yunien long givim petisen bilong en long gutpela pasin.

Mista Wang i tok olsem kampani bai lukluk moa long stretim ol wok bilong en bihainim ol lo bilong wokim bisnis insait long PNG.

# Ol mama wokim salim pis na urita

James G. Kila i raitim

OL MAMA long ol viles arere long Madang taun nau i amamas bikos em taim bilong pis na urita i kam klostu long nambis na ol i ken kisim na go salim.

Dispela ol mama bilong Malmal viles long

Rivo klostu long Madang taun i bringim naispela ol urita i go salim long ol kastoma long Madang taun.

Ol i bringim igo long ol Saina lain husat i save laikim urita stret. Hia em ol i go salim urita long ol lain long Ramu NiCo long Jombang long Madang taun.



Tripela meri bilong Rivo viles stat long raithan Maggie Duadak, Elizabeth Tibong na Serah Mesak i bringim urita na pis long salim long ol kastoma long Madang taun.

# K8.5 milien Projek kamap long Daulo Distrik

Lorraine Basse i raitim

**LONG Tunde 26 Januəri, Memba bilong Daulo Distrik, Ron Ganarafo i bin givim ol sek wantaim mani mak inap long K8.5 milien i go long wan wan bilong ol 18 kontrakta kampani husat bai kirapim wok bilong edukesen sekta long distrik.**

“Mi laikim gutpela sevis wantaim ol gutpela haus we bai ol pipel bilong mi long Daulo Distrik, i nidim, mas kamap hariap na mi laikim lukim.” Ron Ganarafo i tok.

Mista Ganarafo i bin wokim dispela toktok insait long wanpela seremoni we i kamap long Steak Haus long Goroka taun.

Mista Ganarafo i tok olsem i gat bikpela nid long kamapim gutpela senis long ol komyuniti insait long Daulo distrik. Olsem na olgeta lain i mas wok bung wantaim long bringim sevis.

“Yumi gat longpela rot i stap yet long karamapim olgeta sekta tu. Kain olsem transpot na helt bikos yumi sot tru long ol dispela sevis inap longpela taim.” Mista Ganarafo i tok.

Ipa Seke, Ekting distrik edministreta na Eksekutiv Opisa bilong projek, i tok olsem Daulo Distrik i gat ol arapela projek tu i stap, tasol namba wan tingting em i go long Edukesen Sekta bikos Memba i givim tok

orait long dispela. “Long 2015 mipela i no bin wokim ol projek bikos taim bilong kisim ol mani bilong baset i bin sot, bikos ai bilong gavman i bin stap moa long ol Saut Pasifik Gems.” Mista Seke i tok.

Mista Seke i tok moa olsem Daulo Distrik i bin kisim mani bilong en long laspela kwata bilong 2015 na ol i sainim ol kontrak pepa inap long K6 milien bilong edukesen sekta tasol.

Na dispela K6 milien Projek mani i kam long Distrik Sevis Impruvmen Program (DSIP) na ol bai yusim long kirapim 11-pela haus tisa, 5-pela dabol klasrum na ablusen blok wantaim wanpela

bikpela haus bilong kaikai long Daulo Haiskul. Daulo haiskul bai kisim 200 moa sumatin long dispela yia.

Daulo distrik em i wanpela namba wan distrik long kantri long go het wantaim ol projek bilong en aninit long Distrik Saplai na Tenda Bot (DSTB), em i wanpela han bilong Sentral Saplai na Tenda Bot (CSTB) i kamap aninit long seksen 39 bilong Pablik Fainens (Menesmen) Ekt 2003 bilong lukautim na stretim ol rot bilong baim ol samting bilong wok wantaim mani bilong gavman.

# Ol meri hailans i planim buai

Piksa na stori i kam long Mathew Yakai bilong MY Midia na Nius Ejensi MOLINA, Morin, Raymond na Ronda i bilong Alkena viles insait long Lowa Kagul Distrik bilong Westen Hailans Provins. Ol i go stap raun insait long Usino long Madang wantaim Maggie na Borkent Famili long taim bilong Krismas.

Na long taim bilong malolo bilong ol, ol i helpim dispela ripota, Mathew Yakai wantaim meri bilong en, Maggie long planti ol “gol prut diwai” sit bilong buai. Long Fraide 22 Januəri, ol i

planti moa long 1,500 sit bilong drai buai. Tingting bilong em long kapsaitim ol prut bilong dispela buai bihain long 4-pela yia i go long hailans rijon na tu long ol maket bilong Pot Mosbi nau i gat bikpela tambu bilong salim buai i stap.

Ol yangpela pikinini meri bilong hailans i kisim skul olsem planim na lukautim buai diwai em i no wanpela isi wok, maski em i save kamapim tausen, tausen kina bilong ol hailans lain husat i save putim bikpela tingting long mekim mani hariap wantaim dispela prut.

James G. Kila i raitim

LONG TAIM bilong bikpela san na ples drai na no gat ren pundaun, planti eria long Madang provins i braun stret na bikpela das i kirap.

Tude bikpela ren i pundaun stat long mun Novemba i kam olsem, na ol gras i gro gen na mekim ples i grin na luk nais tru. Tasol gras i gro i givim hatwok gen long ol lain bilong klinim ples olsem ol gras-kata na ol lain bilong yusim lonmowa na ol graskata long katim gras.

Ol lain bilong wokim bisnis long katim gras long ol taun bai amamas nau, bikos ol bai kisim mani taim ol i wokim wok raun long katim gras

yusim lonmowa o graskata.

Long 2015 stat long mun Epril i go olsem long Oktoba, longpela taim bilong san na ples i drai nogut stret. Planti pipel i kisim hat taim tru long wara long kukim kaikai, dring, waswas na wasim klos. Ol ples olsem long Not Kos Rot (NCR) i go olsem long Bogia, Manam ailan, Karkar ailan na Long ailan i bin kisim hatpela taim stret wantaim drai sisen.

Nau yet ripot i soim olsem ol wara baret na riva long NCR na tu ol eria long Bogia i lukim ren i pundaun na wokim ples i grin gen. Ol manmeri tu i go wok long gaden na groim ol kaikai gen.

# Taim bilong ren na moa gras long katim



Tobby bilong Raibus Enjiniaring Limited (REL) i hatwok nau long katim gras bikos ren i pundaun gen long Madang. Foto: James G. Kila



# Murray i bihainim Tomic long winim top 10

WOL namba tu pilaia, Andy Murray, i bihainim Bernard Tomic, long winim top 10 long Australian Open.

Murray i winim namba foa raun bikos em i bin yusim tingting bilong em gut long gem na i daunim birua pilaia bilong em.

Namba wan sempion bilong dispela resis i tokim ol nius lain olsem, "Tomic i bin painim hat taim long salensim Murray."

"Mi ting em i yangpela pilaia long top 20. Em i save pilai gut long planti yia. Em i namba wan pilaia long Australia."

Long pilai graun, planti pilaia i save painim hat long kontrolim presa, tasol em i save kontrolim presa gut tru.

"Mi ting em i save pilai gut tenis long Australia Open long Davis Kap na em i lus long tupela resis tasol.

Long 2008, Tomic kamap namba wan pilaia stret, taim i no gat wanpela moa namba wan pilaia i bin

kamap long resis wantaim em. Andy i stap klostu long go insait long top 10 nau."

Murray i tok, "Mi save long wanem samting i kisim mi go long hap. Nau mi bai go long wok olgeta taim."



# Zampa i go insait long ODI wokabaut

NAMBAWAN lek spina, Adam Zampa, i bin go insait long skwat bilong Australia long i go Nu Silan wokabaut, tasol narapela man i save wokabaut, Usman Khawaja, em ol i bin lusim.

Khawaja bai no inap long resis long 14-man skwat long pilai tripela resis egensim Blek Keps.

Dispela resis bai stat long Febueri 3 na ol man i makim Zampa long resis.

Ol i bin makim Zampa aninit long em i bin soim nambawan stail pilai bilong em long Bik Bes Lig reis long Melbourne, Australia.

Siaman bilong selekta, Rod Marsh, i tok, "Ol i bin



makim Zampa pas long Nathan Lyon, bikos ol i laikim Lyon long redi long pilai egensim Nu Silan."

"Mipela laikim Lyon long yusim Nu Saut Wels wantaim Wes Australia Shefil Shil resis long Nu Silan," Marsh i tok.

"Bihain long dispela,

mipela bai igat inap sans long lukluk gut long Adam Twinti20 bai kamap long Mas long India.

"Adam i bin soim tru kala bilong em long Bik Bes na Matador Kap long bipo sisen na mipela ting olsem em bai winim dispela sans."

# Konta i daunim Makarova

BRITEN meri, Johanna Konta, we mama i karim em long Australia, i go insait long kwata fainel bilong Australia Open na i daunim Ekaterina Makarova.

Konta i bin pilai wantaim wanpela namba wan pilaia long Saina, Zhang Shuai, na i daunim em 15 taim olgeta.

Em i bin go long Yunaitet Kingdom taim em i liklik meri, na em i namba wan Briten meri husat i go insait long fainel 8 long Melbourne inap long Jo Durie i bin pilai long 1983.

Manmeri i pulap stap long Margaret pilai graun i singaut strong taim Konta i pilai gut na i tokim ol asples lain long helpim em long go long asples bilong em.

"Tingting bilong mi tokim mi olsem ol lain i stap ausait long pilai graun na i singaut. Mi mas kisim strong na pilai

gut," Konta i tok.

"Mi pait strong long kisim olgeta poin."

I no gat wanpela asples meri i go long kwata fainel inap Daria Gavrilova, husat i bin bon long Sydney i resis

wantaim Konta.

Nau Konta bai pait long kwata fainel wantaim wanpela pilaia, husat ol i tingting olsem em bai no inap long go insait long kwata fainel.



# Melbourne Siti i kwalifai long W-Lig gren fainel



MELBOURNE Siti i daunim Brisbane Roar, 5-4, long wanpela penelti AAMI Pak pilai graun na i kamap kwalifai long W-Lig gren fainel.

Wanpela pilaia bilong Brisbane, Angela Beard, i misim wanpela kik long sait bilong em na i setim bal bilong De Vanna long kamap wina.

Siti bai go long wankain pilai graun long long Sande long

takel wantaim Sydney FC.

Sydney FC i daunim Canberra Yunaitet, 1-0, long las Sande na i traim long winim sempionsip long namba wan taim bilong ol long pilai long W-Lig resis.

Siti i winim olgeta 12 sisen resis we em i bin daunim Brisbane Roar tupela taim na i kamap namba wan long lata.

Ol namba wan namel pi-

laia bilong Roar, Katrina Gorry na Kirsty Yalop, i no stap na kosa bilong ol, Belinda Wison i larim ol sampela liklik pilaia long pilai.

Siti i stiaim bal gut tru na i go inap sans long skoaim poin.

Roar i makim sampela namba wan kik i go insait long gol pos bilong ol Siti, tasol gol kipa bilong Siti, Haley Kopmeyer, blokim bal gut tru.

# Panthers na Broncos bai bung long San Francisco

CAROLINA Panthers na Denver Broncos bai bung long Supa Bowl 50 bihain long tupela i daunim Arizona Cardinals na Nu Ingran.

Panthers i daunim Cardinals wantaim 49-15 rut we kwata-bek bilong ol, Cam Newton, i pinisim 19 long 28 pas wantaim 335 yad.

Birua pilaia bilong Newton, Carson Palmer, i pinisim hap bilong pas bilong em wantaim 235 yad.

Bihain long gem, Newton i tok em i no save long husat bai lainap egensim em long Supa Bowl long Sande, na

em i amamas long bungim Peyton Manning long bikpela gem.

Manning win 17 raun na

daunim Tom Brady na Broncos i kamap wina wantaim 20-18 na daunim asples birua.





# Moa egrikalsa bisnis trenining bai kamap long 2016

**OL WIMEN grup insait long Kostal Paipain eria bilong Ramu Nickel Projek i amamas tru long Ramu NiCo Menesmen i givim trening long wok egrikalsa long sait bilong lukautim ol enimol na bisnis menesmen.**

Kostal Paipain Wimens Asosiesen em wanpela bilong 4-pela wimen asosiesen

grup insait long Ramu Nikel projek eria long Madang provins we i kisim mani helpim i kam long Mineral Resource Atoriti (MRA) aninit long Wimen in Mining small gren program.

Long 2014 MRA i bin baim wanpela PMV Trak na wanpela moto bot na givim ol meri long Kostal Paipain

eria long helpim wok bilong ol meri long dispela eria. Ol meri long Kostal Paipain i amamas tru long Ramu NiCo long helpim ol wantaim trening bilong long lukautim laipstok o enimal abus olsem kakaruk na pik, na tu bai helvim ol long skul bilong lukautim bisnis.

Siameri bilong Kostal



**Basamuk Wimens sainim WIM kontrak long piggery projek long 2014**



**Egrikalsa trening long Kostail Paipain eria long Raikos**

Paipain Wimens Asosiesen, Miriam John tok olsem liklik win-moni ol mekim long PMV bisnis em ol i yusim long traime kirapim poltri o kakaruk fam na banis pik wantaim halvim bilong Ramu NiCo long training.

Mrs John tok olsem PMV bisnis bilong ol kam tru tasol sampela taim i save gat i hevi tasol ol meri i wok bung wantaim long wokim bisnis i gro.

Em tok moa olsem 150 pela meri insait long Bibi ples olsem long Marakum long Raikos distrik i lamas long ol laipstok trening long sait long lukautim kakaruk na pik na tu bisnis menesmen trening.

“Liklik mani bilong kar em now mipela bai yusim long trening na wantaiem helpim bilong Ramu NiCo long statim kakarum na pig fam projek,” Namba wan hap bilong training em ol Komyuniti Afes Dipatmen Agrikalsa seksin lain bilong Ramu NiCo i bin wokim pinis long mun Septemba, 2016 na wok i go yet,” Misis John i tok.

Em tok tu olsem namba tu hap bilong trening bai kamap long mun Jun dispela yia 2015 we bai lukim moa long 150 meri i stap long trening.

Misis John i tok namba wan hap bilong trenning i helpim ol long gut long lainim basik bilong piggery bisnis na namba tu hap bai helpim ol long groim bisnis bilong ol. Em tok bikipela tenk yu i go long Ramu NiCo

long helpim ol wantaim trening na lojistiks we i helpim na sapotim ol meri long wokim bisnis long pigeri projek na ol narapela bisnis.

“Mipla amamas tru long Ramu NiCo, MRA na ol mani bilong mipela husait ol sanap baksait long ol na sapotim ol long PMV bisnis wantaim pigeri na ol oltaim save rispektim mipela long disisen mipela mekim,”

“Dispela namba wan training i wokim mipela i laikim moa yet bilong helpim mipela gro wantaim kainkain save bilong wokim bisnis,” Em tok.


Em tok training tu helpim ol long wokim bisnis na sevim mani.

Ramu NiCo Agriculture Supavaisa Allan Wawah tok namba tu hap bilong trenning bai kamap long June na em yet bai i givim dispela bisnis manasmen traning.

Em tok olsem ol mama long Kostal pipeline ol fes lain long wokim bisnis bilong ol gro bipela statim wantaim PMV bisnis.



**Ramu NiCo givim trening long ol meri insait long Ramu NiCo Projek**



**135 KM Slurry Pipeline**

KBK Mining

BSK Refinery

# Kosa Marum i tokaut long ol skwat bilong Hunters

**KOSA bilong PNG SP Hunters, Michael Marum, i tokaut long ol skwat bilong Hunters bai pilai egensim ol Penrith Panthers long Nesenel Futbol Stediam (NFS), bipo ol i bin kolim Lloyd Robson Oval.**

Dispela i traim pilai bai kamap long Sarere, Febueri 6, na opim NFS. Gem bai stat long 5.45 apinun na ol bai pilai aninit long lait.

Kosa Marum i tokim ol pilaia bilong em olsem olgeta skwat bilong Hunters i no gat wanpela bagarap, tasol em i laik lukim kala bilong ol nupela pilaia olsem ol i winim mak bilong pilai long ol gem long Kwinslan na Nu Saut Wels Kap.

Em i laikim ol nupela pilaia bilong Hunters olsem Ishamel Baikawa, Watson Boas, Sailas Gahuna, Benjamin Hetra, Philemon Kimiseve, Tuvi Lapan, Justin Olam, William Aquila, na John Ragi bai gat planti taim long pilai long ol i ken winim

tingting bilong kosa long kosa i ken larim dispela tim i ken pilai long namba wan raun bilong Intras Supa Kap.

Raun namba wan bilong Intras Supa Kap bai stat long Mas na Hunters bai pilai wantaim Sauts Logan Magpies long Brisbane long Mas 6.

Ol tiket bilong SP Hunters wantaim Penrith traim pilai em ol bai stat salim long Trinde, Febueri 3 long olgeta Stop and Shop supa maket long Pot Mosbi.

Ol bai salim tiket long K50 long granston na ol narapela hap bilong sindaun na lukim pilai em ol bai salim long K25.

Lista bilong olgeta SP Hunters skwat em

- 1 ABAVU Bland
- 2 AMEN Stargroth
- 3 AQUILA William
- 4 BAIKAWA Ishamel
- 5 BOAS Ase
- 6 BOAS Watson
- 7 BORANA Nixon
- 8 GAHUNA Sailas

- 9 GLARE Warren
- 10 GOMA Edward
- 11 HETRA Benjamin
- 12 KIMISEVE Philemon
- 13 KORAVE Adam
- 14 LEPAN Tuvi
- 15 OLAM Justin
- 16 PUARA Wartovo
- 17 RAGI John
- 18 SIUNE Esau
- 19 TETEH Thompson
- 20 WABO Ate Bina
- 21 WAN Henry
- 22 WERA Adex
- 23 ZEMING Noel

Ol pilaia husat i bin kisim bagarap em; 24. MAKI Enoch, i bin orait long em i bin go long operesen long skru bilong em, 23. BENFORD Anderson, i bin go long operesen bilong em, 24. PETER Brandy, i bin go long operesen long han bilong em, na 25. PETER Simon tu i bin go long operesen.

Ol pilaia husat i go long operesen em nau ol i orait na i stap sambai long pilai.

Piksa i soim narapela sait bilong grensten bilong Nesenel Futbol Stedum. Baksait lukluk i soim Is Boroko long Pot Mosbi.



Dispela piksa i soim trai lain sait bilong NFS, we bipo get bilong Lloyd Robson Oval i bin stap long dispela sait.



Ol piksa: Philemon Tame



Dispela piksa i soim grensten bilong Nesenel Futbol Stedum, we ol bai baim K50 long go sindaun, taim pilai namel long SP Hunters wantaim Perith Panthers i kamap long Febueri 6.

## Pot Mosbi i namba wan siti

### Philemon Tame i raitim

INTERNASENEL Olimpik Komiti (IOC) i lukim Pot Mosbi olsem namba wan siti long ol narapela siti long wol.

Pot Mosbi i luksave long 'Wokabout bilong Laif' na 'Yoga bilong Laif' program we gavana bilong Nesenel Kapital Distrik (NCD), Powes Parkop, i save kamapim olgeta taim.

Dispela i Global Ektiv Developmen Projek we IOC i save sapotim dispela program, long promotim siti long kamap strong na painim gutpela sindaun. Na, ol manmeri long siti i ken pilai spot long kamap strong na rausim ol kain kain sik i kamap long bodi bilong ol.

Dispela program tu i tokaut long ol siti atoriti olsem em i namba wan samting long senisim ol komyuniti.

Namba wan astingting bilong dispela program em long bungim olgeta siti aninit long olimpik long olgeta hap long wol we ol i gat bikpela wok long mekim.

Papua Niugini Olimpik Komiti (PNGOC) i amamas na tok tenkyu long Gavana Powes Parkop na Nesenel Kapitel Distrik Komisn (NCDC) long hatwok ol i mekim long kamapim Pot

Mosbi klin, na em i eksampel we ol i soim ol narapela rijon long bihainim.

Presiden bilong PNGOC, Sir John Dawanincura, i tok, "Dispela luksave em i kala bilong tingting bilong yu long mekim Pot Mosbi i kamap klin bilong ol manmeri i stap long siti."

"PNGOC i strongim planti lain long stap wantaim long fan, seif na gutpela wokabout, aninit long ol gutpela samting olsem spot," Sir John i tok.

"Mi laik tok tenkyu long IOC long luksave bilong em long helpim mipela long promotim siti bilong yumi olsem strongpela, gutpela na fit siti," Gavana Parkop i tok.

"Dispela bai apim level bilong program na siti bilong yumi long kisim biknem, na long dispela astingting, em i wanpela developmen i kam we yumi i mas kisim strong long han bilong yumi."

Olsem sait bilong dispela program, ol i bin raitim pas i kam long NCDC long salim ol deleet long go long namba wan bung bilong Ektiv Siti projek long Liverpool, Ingran long Febueri 3 inap 6.

Bung bai toktok long developim ol siti aninit long dispela nupela amamas projek. Na ol savelain long



Global Ektiv Siti Developmen tim bai toktok long ol kain kain samting bilong projek na ol bikpela benefit bilong ol siti husat i bihainim Ektiv Siti bung.

Ol narapela siti bai bung

wantaim Pot Mosbi long Liverpool em Lillehammer (Norway), Ljubljana (Slovenia), Lausanne (Switsalan), Richmond (Kanada), Izmir (Turkey) na Buenos Aires (Argentina).

**Wokabout bilon Laip kisim luksave: PNGOC presiden Sir John Dawanincura i tokaut long luksave bilong wokabout bilong laip taim Gavana bilong NCD na man i go pas long wokabout bilong laip Powes Parkop i lukluk.**

Poto Nicky Bernard.

# 24 skwat bilong Panthers

Penrith Panthers i tokaut long 24 skwat bilong ol husat bai pilai egensim ol SP Hunters na opim Nesenel Futbol Stedium (NFS) long Febuəri 6.

Ol i bin makim ol skwat bilong ol aninit long tripela klap olsem NRL, NYC na NSW Kap pilaia.

Ol i bin makim Jamie Soward long pilai long faiveit posisen wantaim narapela poro pilaia bilong ol olsem Suaia Matagi, Leilani Latu, Adam Watene-Zeleznai na strongpela prop bilong ol, Sam McKendry.

Kosa bilong Panthers, Steve Georgallis, i givim bikpela salens long kosa bilong SP Hunters, Michael Marum, taim Georgallis i tok aut long nem bilong ol skwat bilong em.

Jenerel Menesa bilong ol Panthers, Phil Gould, bai kam wantaim tim.

Ol Panthers bai gat wanpela trening ran long NFS long Fraide, Febuəri 5 long 4:30

apinun. Tim bai kam long balus PX 4 na kam kamap long Pot Mosbi long 01:30 apinun long wankain de.

Pilai bai kamap insait long 80 minit na tupela kosa i wanbel long ol i gat planti risev pilaia.

Lista bilong ol skwat bilong Penrith Panthers;

- 1 Brent NADEN
- 2 Adam WATENE-ZELEZNAIK
- 3 Marli SINI,
- 4 Maliko FILINO
- 5 Joshua HALL
- 6 Jamie SOWARD
- 7 Samuel CLUNE
- 8 Suaia MATAGI
- 9 Joshjua TANGITAU
- 10 Samuel McKENDRY
- 11 Peter NAY
- 12 James FISHER
- 13 Leilani LATU
- 14 Tyrone MAY
- 15 Andrew SAUNDERS
- 16 Sitaleki-Moala AKAU'OLA LAULA
- 17 Rodney COATES
- 18 Tupou SOPOAGA
- 19 Jerry KEY
- 20 Wellington ALBERT
- 21 Raymond LESOA
- 22 Antonio TAUILILI PELESASA
- 23 Nathan CLEARY
- 24 Oliver CLAR

# Klap long Baaz Kap bai kisim yunifom

**Philemon Tame i raitim**

OL klap long Nesenel Kapitel Distrik Komisin (NCDC) Isten Hailans Baaz Kap resis bai kisim nupela yunifom.

Presiden bilong NCDC Hailans Baaz kap resis, Benny Kene, i tok, "Membra bilong Not Is, Labi Amaiu, i bin mekim tok promis olsem em bai givim nupela yunifom long olgeta klap aninit long Baaz klap."

"Membra i bihainim tok promis bilong em na i bin givim nupela yunifom long 16 klap pinis na liklik namba i wet yet long kisim nupela yunifom bilong ol," Presiden Kene i tok.

"Amaiu i bin sponsaim dispela klap bipo, taim em i no bin stap memba yet, na long dispela astingting, olgeta klap i gat nem bilong Amaiu i stap long baksait bilong yunifom bilong ol."

Kene i tok moa olsem em i bin kisim presiden sia long yia 2010 na 2016 sisen em i namba 6 raun bilong em long stap presiden.

"Moa long 40 klap i bin sainim nem aninit long Baaz kap resis, tasol dispela namba i kam daun long 34 bikos i no gat gutpela fesiliti i stap bilong ol pilaia bai stap sef na pilai," Kene i tok.

"Nogat gutpela pilai graun, nogat sekyuriti na

planti moa samting i sot."

Dispela resis i gat 'A' gret na 'B' wantaim i save pilai we ol 'B' gret i save stat long Fraide inap Sande long Unagi oval.

Olgeta sisen i save stat long Novemba inap long pinis bilong Mas na nau ol i pilai op-sisen bilong ol.

Kodineta bilong dispela resis i tokim ol referi long ol i mas no ken kontrolim ol pilaia taim ol i go insait long kontrolim gem.

"Yupela i no go insait long pilai graun long kontrolim ol pilaia, nogat. Yupela i go insait long kontrolim gem," kodineta i tokim ol referi.



Piksa i soim tupela klap long NCDC Isten Hailans Baaz Kap i pilai long Unagi pilai graun long las wik Sande. CFMEU em i tim ol i werim grinpela siot na yelopela siot em ol Pamusa Warriors. CFMEU i traim hat na i putim namba wan trai long namba wan hap we ol i bin makim liklik taim long pilai. Ol Pamusa i bekim trai bilong ol na i kisim wankain poin, 4-4, tasol long namba tu hap, ol CFMEU i putim wanpela moa trai wantaim 6-pela poin na skruim skoa i go antap long 10. CFMEU i win 10-4

# Ol senia weitlifta bai kam resis

*...bai strongim ol junia weitlifta*



Piksa i soim junia meri weitlifta i trening long namba wan taim bilong trening bilong ol Weitlifting Federesen i bin kamap long Indo Senta long Sir John Guise Stediam. Trening i bin kamap long go resis long Osenia Sempionsip bai kamap long Fiji long mun Epril. Ol pilaia husat i save stap long Pot Mosbi tasol i trening long namba wan taim bilong trening. Tasol, namba tu trening bai kamap long Taurama Indo Akwatik Senta, na ol senia lifta bai kam trening wantaim ol junia bilong ol na i apim amamas tingting bilong ol. Ol bai trening long olgeta mun inap pilai bai kamap long Epril. *Piksa: Philemon Tame*

**Philemon Tame i raitim**

OL senia weitlifta aninit long Papua Niugini Weitlifting Federesen olsem Dika Toua, Thelma Toua, Steven Kari na planti moa bai kam mekim wok redi long Taurama Indo Akwatik Senta long Pot Mosbi.

Dispela wok redi bai kamap long Sande, bilong ol bai go resis long Osenia sempionsip long Suva, Fiji long Me 21 inap 25.

Ol senia weitlifta olsem Kari na Toua i save resis long ol bikpela resis olsem Komonwelt Gems na i save kamap sempion.

Namba tu presiden bilong PNGWF, Frank Robby, i tok, "Taim ol senia weitlifta i kam long mekim wok redi, ol bai strongim tingting bilong ol junia weitlifta na ol

narapela husat i bin resis long namba wan traim resis."

"Namba wan traim resis i bin kamap long las mun em ol pilaia husat i save stap long Mosbi tasol i resis, na ol pilaia husat i save trening long Noumea, Nu Kaledonia, i no bin stap long dispela resis," Robby i tok.

"Resis bai kamap long dispela wiken bai strong moa bikos ol namba wan lifta bilong PNG, husat i save stap long ol narapela kantri tu bai kam resis long namba tu resis.

"Mi gat bikpela amamas long ol senia weitlifta bai kam resis wantaim ol junia na em bai strongim laik long pilai bilong ol junia lifta," Robby i tok.

Robby i tok moa olsem dispela resis long mun bai

go het inap long Epril taim ol i makim ol senia na junia skwat long go long Fiji.

"Mipela i gat mun resis em i bilong makim fainal tim bilong go resis long Osenia Sempionsip, na mipela bai mekim seleksen aninit long ol pilaia i kam long trening olgeta taim, disiplin bilong ol insait na ausait long pilai graun, na abrusim mak we ol i bin putim long go resis long Osenia Sempionsip," Robby i tok.

"Ol bai makim 15 skwat long senia weitlifting na 15 skwat long junia long go resis.

"Bihain long Sempionsip resis long Suva, ol bai makim wanpela senia man weitlifta na wanpela senia meri weitlifta long makim PNG na go resis long Rio Olimpik Gems long Brasil," Robby i tok.

# Traim pilai bilong Lagatois i stat

**Philemon Tame i raitim**

NESENEL Kapital Distrik Sabeben Lagatois i statim traim pilai bilong ol long las wik Sande long Kone Tigers pilai graun long Waigani, Pot Mosbi.

Ol i bin makim ol pilaia aninit long 8-pela tim ol i save resis long Kap bilong NCD Gavana long kamapim las 4-pela sait tim.

I gat 4-pela gem i kamap we tim 1 i bin pilai wantaim tim 5, 2 i bin pilai wantaim 6, 3 i bin pilai wantaim 7 na tim 4 i bin pilai egensim 8.

Ekting Siaman bilong resis, Peter Wai, i tok, "Foapela tim bai go het na resis long dispela wiken bihain long dispela resis."

"Ol lain bilong makim ol pilaia i pikim ol namba wan pilaia aninit long 8-pela tim

long namba wan traim pilai long las wik Sande," Wai i tok.

"Lagatois i nupela frensis klap long go insait long Digi-cel Kap resis long dispela yia, wantaim ol pilaia ol i bin makim long Sabeben Lig long Pot Mosbi na ol narapela op-sisen resis.

"Dispela em i plen we Ragbi Lig Siaman bilong Pot Mosbi Sabeben, Billy Aki, i kamapim."



**MIS PAIA:** Beta bilong PNG Pawa i traim long paitim bal tasol em i mekim bikipela mis na ketsa bilong Gazelle i ketsim.



**HEI OLSEM WANEM?** Kepten na bek ketsa bilong PNG Pawa i singaut long ol pilaia long tromoi bal i go long em taim pilaia bilong Gazelle i ran kam hom na ampaia Peter Chalapan i lukluk gut.



**MIPELA LUKAUTIM PILAI:** Tripela strongpela ampaia bilong sofbal long Bisini i sanap na givim tingting bilong ol yet.



*Ol poto: Nicky Bernard*

**MI FLAI:** Straika bilong Gigira i flai na kikim bal i go long mak bilong PS long Sande pilai bilong ol long NSL long Bisini. Gigira i win 2-1.



**HOLIM MI:** Prisen ragbi yunien 7 resis long Bava.



**KAM HELPIM:** Kepten bilong PS United i lukluk long pasim bal i go long wanpela pilaia bilong em taim yangpela straiika bilong Gigira FC i pasim rot bilong em.



**YUMI BAM:** Tupela meri i traim strong bilong ol long Ragbi 7 resis long Bava pilai graun.

**IMPROVED TASTE!** Niupela teist wantaim planti mit na oil. Teistim na bai yu laikim moa yet.

# DIANA

Tuna

Emi tuna  
bilong PNG



PROUDLY  
PNG  
MADE

Manufactured by:



RD Tuna Canners Ltd.

Moa mit na  
oil insait



**TUNA IN OIL**

**Nicky Bernard i raitim**

**YANGPELA** Gigira FC i kisim bek fom bilong ol taim ol daunim PS United 2-1 long Sande pilai bilong ol long Telikom Nesenel Soka Lig resis.

Gigira i putim ol yangpela pilai bilong ol tasol long kisim PS United na dispela ol yangpela mangi i soim ol menesa bilong ol olsem ol ken holim Gigira Laitepo FC long 2016 na 2017 taim NSL bai stat.

Ol yangpela Gigira i soim gutpela pilai long beks i kam long namel na fran, we ol PS United i wok long paul long makim ol man bilong ol.

Gigira i kisim wanpela gutpela sans taim beks bilong ol i salim wanpela gutpela bal kam stret long lep winga bilong ol, na em kisim dispela bal na salim stret go bek long rait winga bilong ol July. July i kisim dispela bal na em wantaim kepa bilong ol PS tasol, July giamanim kipa bilong PS na isi tasol em salim bal go long net bilong ol PS long putim tim bilong Gigira go pas long skoa 1-0.

Ten minit bipo long tupela tim go malolo, Gigira i putim namba tu gol bilong i kam long gutpela kros bal i kam

# Yangpela Gigira strong tumas



Ol yangpela Gigira. Foto:Nicky Bernard

long lep winga na painim stret lek bilong strika bilong ol long salim gen bal go insait long net bilong ol PS long bringim skoa 2-0 na ol go malolo.

Namba tu hap bilong pilai, tupela tim wantaim i senis pilai bilong ol. PS i strongim fran lain bilong ol long traim long skoa ol gol tasol Gigira i strongim banis bilong em wantaim kepten bilong ol.

PS i bin gat planti sans long skoa tasol banis bilong Gigira i senis long namba tu hap bilong ol. PS i traim olgeta rot long skoa tasol kepten bilong ol Gigira i toktok strong long ol boi bilong em long banisim gut ol rot bilong ol PS.

PS United i kisim wanpela fri kik na dispela fri kik bilong ol i kamapim gol bilong ol long bringim skoa 2-1. Dispela gol bilong ol i mekim ol skin kirap na ol i no isi long gol makim bilong ol Gigira. Tasol ol yangpela Gigira i pilai isi na banisim gol mak bilong ol inap pilai pinis.

Long dispela wiken ol yangpela Gigira FC bai traim bun bilong ol Gulf Erema na sapos ol winim dispela pilai long dispela wiken bai go antap liklik long poin lata bilong NSL.




# PMV

DIESEL OIL

# PMV OIL BILONG YUMI



BOROKO MOTORS	
PORT MORESBY	325 5255
LAE	472 1144
MT HAGEN	542 1933
TABUBIL	649 9048
KIMBE	983 5035
MADANG	422 2659
KOKOPO	982 6193
GOROKA	532 3552

Email: info@borokomotors.com.pg  
Website: www.borokomotors.com.pg